

摘藻堂四庫全書薈要

史部

欽定四庫全書薈要

史部

御批通鑑綱目前編卷一

詳校官編修臣汪鏞



欽定四庫全書薈要卷七千二百八十五

史部

御批資治通鑑綱目前編卷一

陶唐氏帝堯

羅氏路史曰堯生於母家伊侯之國後徙者故曰伊耆氏年十有三

佐摯封植受封于陶通鑑外紀曰年十五長十尺受封唐年十六即天子位耆左氏傳作祁漢

史曰

伊氏

書曰粵若稽古帝堯曰放勳

粵起語若稽追記之辭古崇之也堯名古者世質雖

天子不諱其名放大也放勳者總名其德業之大也一日放如推而放諸之放謂推廣以成其功也聖人亦善推其所為而已意與下文二章相應二字

本史官稱堯之語後世因以為堯稱焉

欽明文思安



安允恭克讓光被四表格于上下

此叙堯之德也欽誠敬也明精明也文文

理也經緯天地曰文謂其彌綸天地之道倫理明順煥乎其有文章也思言其運量裁處意思周密所謂其智如神也安安舊說止其所止然二字氣象自別蓋其盛德從容之極難以形容故以安安言之恭讓欽之接於人也謂之允克則其至誠之發真實氣象又自不同光被四表言其發越覆冒之盛格于上下言其充塞感通之極也史臣叙堯之德而以欽為首此聖人之心法也允恭以下即四德之推恭讓者欽之發被四表者明文之著格于上下則思之感通也朱子常言聖人之心精明純粹而已則欽明二字已足以盡聖人之德矣而又曰文思陳文蔚曰兼語其用也文者明之用思者欽之用欽明即惟精惟一文思即允執厥中也子王子曰欽明文思猶言

仁義禮智

克明俊德以親九族九族既睦平章百姓

百姓昭明協和萬邦黎民於變時雍

明推明也俊德大學作峻蓋其得乎

天而出乎其類者即上文所叙之德也平者和同之章者品節之百姓者帝畿之民昭明則民心風俗之俱新也萬邦諸侯也協考比也如協時月如國語司民協孤終司徒協旅之協皆考比之義和調齊也萬邦諸侯豈無賢庸之不齊聖人朝覲巡省考禮正刑一德黜幽陟明皆所以協和之也黎民黑首之民舉天下生靈之衆也上文紀聖德之盛此章紀治化之序聖人治天下其機有二一則聖德發越自然感化一則布政施化推而廣之也

甲辰元載乃命羲和

邵子皇極經世書係之元年又東漢志晉志皆引春

秋文曜鉤曰唐堯即位羲和立象儀則是命羲和帝堯即位之初政也又按國語楚觀射父曰

少皞之衰也九黎亂德顓頊受之乃命南正重司天以屬神命北正黎司地以屬民堯復育重黎之後不忘舊職使復典之以至夏商故重黎氏世叙天地而別其分主楊子曰義近重和近黎韋昭曰即義氏和氏也

乃命羲和欽若昊天歷象日月星辰敬授人時

羲和二氏也歷

紀數之書也言天者所謂堯歷也象者觀天之器後篇所謂璣衡之屬是也言天者謂渾儀實始于此上古以來因時作事而歷法蓋未備帝堯始為歷象之制定其財成輔相之節以授其民遂為後世常行之準焉朱子曰此所命蓋羲伯和伯下文分命其仲叔履祥按尚書大傳舜巡四嶽祀泰山霍山皆奏羲伯之樂華山弘山奏和伯之樂其方與時與二氏所掌者合則羲伯和伯當有其人蓋四子分職必有二伯總之不然歷法無所

統分命羲仲宅嵎夷曰暘谷寅賓出日平秩東作日中

星鳥以殷仲春厥民析鳥獸孳尾申命羲叔宅南交

劉氏

云宅南曰交陳氏云宅南交曰明都

平秩南訛

史記索隱作為

敬致日永星火以

正仲夏厥民因鳥獸希革分命和仲宅西曰昧谷寅饒

納日平秩西成宵中星虛以殷仲秋厥民夷鳥獸毛毳

申命和叔宅朔方曰幽都平在朔易日短星昴以正仲

冬厥民隩鳥獸氄毛

宅度也蔡邕石經作度朱子云宅度古文通歷法以日行起度以日

出入方隅定晷刻氣候宅嵎夷南交西朔方出納敬致皆所以定郊酉子午之中推日道出入之方候朝夕之

景及致日中之景寅敬賓饒謹其事也永短中星皆自是推然候中星又所以定日度也宅嵎夷曰暘谷周禮所謂日東則景夕多風之地也南交日南則景短多暑之地也昧谷日西則景朝多陰之地也幽都日北則景長多寒之地也四方地勢不同風氣亦異各有宜也故測候之際因度其所宜為授時之節所謂平秩東作南訛西成朔易者也易如周官所謂一易再易三易作訛成易皆謂民事各以方異辭耳平秩史記依今文作便程其義尤明日宵永短與中星連言者初分而候中星以星之初見為晝夜之分又分摺四中以得日度之的以日宵之中立二分以永短之極立二至參之民生析因夷隩而為四時之政鳥獸孳尾等語則候之物生此歷家七十二候之法所由起也此皆授羲和以作歷之綱要四子分為四節每節自作訛成易以上分方自日宵永短以下分時

二載定閏法

帝曰咨汝羲暨和朞三百有六旬有六日

有古文作又

以閏

月定四時成歲允釐百工庶績咸熙

帝既命羲和歷象又四時推候皆合

矣積一朞而天有餘度歲有餘日於是又置閏法而日月氣候始參會今歷家所定章法昉乎此隆古風氣未開民淳事簡歷數既定因時頒政而已他無為也故允釐百工而庶績咸熙焉朱子書傳曰歲周三百六十五日四分日之一而曰三百六旬有六日者舉成數也天體至圓周圍三百六十五度四分度之一統地左旋常一日一周而過一度日麗天而少遲一日統地一周無餘而常不及天一度積三百六十五日九百四十分日之二百三十五而與初躔會是一歲日行之數也月麗天而尤遲一日常不及天十三度十九分度之七積二

十九日九百四十分日之四百九十九而與日會十二
會得全日三百四十八餘分之積五千九百八十八如
日法九百四十而一月得六日不盡三百四十八通計
得日三百五十四九百四十分日之三百四十八是一
歲月行之數也歲有十二月月有三十日三百六十者
歲之常數也故日行而多五日九百四十分日之二百
三十五者為氣盈月行而少五日九百四十分日之五
百九十二者為朔虛合氣盈朔虛而閏生焉故一歲閏
餘率則十日九百四十分日之八百二十七三歲一閏
則三十二日九百四十分日之六百單一五歲再閏則
五十四日九百四十分日之三百七十五至十有九歲
七閏則氣朔分齊是為一章也履祥按章法雖云氣朔
齊然猶有分秒之餘至二十七章為會三會為統三統
為元積四千六百一十七年則日月皆無餘分却得十
一月甲子朔子時半冬至則又為歷元
○朱子曰按帝
矣○今立成法率三十二月而置一閏

堯時冬至日在虛昏中昴今冬至日在斗昏中壁中星
不同者蓋天有三百六十五度四分度之一歲有三百
六十五日四分日之一天度四分之一而有餘歲日四
分之一而不足故天度常平運而舒日道常內轉而縮
天漸差而西歲漸差而東此歲差之由古歷簡易未立
差法但隨時占候以與天合至東晉虞喜始以天為天
歲為歲乃立差法以追其變約以五十年退一度何承
天以為太過乃倍其年而反不及至隋劉焯取二家中

數七十五年為近之然亦未為精密也

履祥按帝堯之言天常寬而歷則密後世言天者常密而歷則疎蓋帝堯生知即事洞要其於周天固已知圓竒之妙四分一不足以盡天矣其命羲和不過授之以作歷之綱要如於中星互舉辰象於晷數槩舉全日至於推步度數隨時占候則羲和有司之事帝堯固不必數數然也後世日不足而始為度度不足而更為分秒分秒愈多則算法當愈密矣然久亦未嘗不差也蓋聖人因時制歷雖舉要而不遺後世定歷推天始積分以求密因時制歷則歷與天常相應定歷推天而歷與天常易差無他天圓以動圓故竒動故不測而後世就定法以拘之也然嘗就其說而考之所謂四分度之一也析為九百四十分日之二百三十五果若所言則止日四分之二可也何必析為小分哉太初草創乃以八十一分日之二十分

少固不足論晉志載劉洪王蕃之法則析為五百八十九分度之百四十五如此則四分度之一者乃其大約而於四分一之外天舒日縮又餘小分之九也十年則九十分計百三十年而積差二日矣唐開元大衍厯又析一度為三千四十分每歲日餘三十七分太積八十年而差一度又餘六分自唐至今皆用之然自開元至寶祐五百四十年而差十度則唐厯積分雖多反不如晉志之近密也紹興統元厯漢上朱震典之析一度為萬分每歲氣周三百六十五日二千四百四十六分七十二秒半而周天則三百六十五度二千五百七十二分二十五秒又按堯仲春星鳥宋東井二十一度中仲夏星火宋亢七度中仲秋星虛宋斗十一度中仲冬星昴宋壁一度中堯厯中星與日所次至是差四十餘度矣去堯之世三千五百餘歲而差四十餘度至景定甲子冬至之日已在斗初漸入東陸後此三千六百年已在東陸又三

千六百年過東陸之中又三千六百餘年冬至之日
遂行南陸則冬長夏短幾相貿易造化不幾於變乎
曰非然也唐張說一行歷議曰日之所行即為黃道
日差則黃道與之俱差必不至於冬長夏短矣抑後
世豈無聖人隨世裁成良太史
隨時推移者此固不必長慮也

七載麒麟遊於藪澤

路史曰堯在位七年民不作忒鴟又逃於絕域麒麟遊
於藪澤則能信於人也

十有二載巡狩

發例于此
後不悉書

孔子曰舜臨民以五堯臨民以十二

註十二載一巡狩
也路史註曰杜佑

謂十二載
巡嶽者非

甲子二十有一載

甲申四十有一載虞舜生於諸馮

孟子曰舜生於諸馮

蘇氏古史曰舜生於諸馮之姚墟故為有姚居於馮汭故為有媯履

祥按舜生姚墟因生為姓故為姚姓居馮汭後世復因居馮而為媯姓非舜有二姓也諸馮馮馮汭皆在今河中府河東縣馮水源出首山入西河孟子以舜生諸馮為東夷之人蓋對文王西夷而言猶云東方西方爾故曰地之相去千有餘里蓋自河中至岐周千餘里也而說者指齊之厯山濮之雷夏為舜側微耕漁之地甚者指會稽上虞牛羊村百官渡為舜所居蓋因孟子之言而附會之也

○路史曰其先國于

虞始為虞氏

河東虞阪

系出虞幕。春秋外傳周太史伯曰

虞幕能聽協風以成樂物。生傳曰自幕至于瞽瞍無違

命

謂能服事帝朝

舜重之以明德。○史記曰父瞽瞍盲索隱曰

母握登

史記據世本叙窮蟬橋牛者非

五十載帝遊於康衢

列子曰堯治天下五十年遊於康衢兒童謠曰立我蒸

民莫匪爾極不識不知順帝之則

列子書出三代之末尚多傳聞之辭而此

語亦自得聖人之意學者稱之今不敢棄○文中子曰堯有衢室之問

○時有老人擊壤

而歌曰吾日出而作日入而息鑿井而飲耕田而食帝

何力於我哉

叶入聲胡氏附此歌於九十載間今以類附此

六十載舜以孝聞

史記曰舜母死瞽瞍更娶妻而生象象傲瞽瞍愛後妻子常欲殺舜舜避逃及有小過則受罪順適不失子道孝而慈於弟日以篤謹年二十以孝聞耕歷山歷山之

人皆讓畔

歷山今河中府

漁雷澤雷澤之人皆讓居

今河中府有雷水出

雷首山入河鄭康成謂兖州雷夏澤

陶河濱河濱之器皆不苦窳

水經曰河水南

遠陶城酈道元註即舜陶處在蒲阪北南去歷山不
遠不苦窳言民皆務為厚正之器不薄惡喁斜也 作

什器於壽丘就時於負夏

負夏
衛地

一年而所居成聚二年

成邑三年成都

胡氏皇王大紀作一遷二遷三遷
莊子又有至鄧之墟而十有萬家

○大

紀曰舜年二十孝友聞於人有友七人焉雄陶方回續

牙伯陽東不訾秦不虛靈甫常輔翼之○淮南子曰當

此之時口不說言手不指麾執玄德於心而化馳若神

使舜無其志雖口辯而戶說之不能化一人○萬章曰

父母使舜完廩捐階瞽瞍焚廩

謂舜已下階
而瞽焚之也

使浚井出

從而揜之

謂舜已出去而瞽塞之也。澠水燕談曰：今河中府舜泉坊二井相通，所謂為匿空旁出者也。

也。其廟名之。

曰孝感泉。

象曰：謨蓋都君，咸我績。象往入舜宮，舜在

牀。琴象曰：鬱陶思君，爾忸怩。舜曰：惟茲臣庶，汝其于予。

治不識舜，不知象之將殺已。與孟子曰：奚而不知也。象

憂亦憂，象喜亦喜。

程子曰：人情天理於是為至。

○古史曰：孟子曰：堯

將舉舜妻，以二女瞽瞍不順不告而娶，既而猶欲殺舜。

而分其室，舜終不以為怨。余考之書，孟子蓋失之矣。四

獄之薦舜曰：烝烝乂，不格姦。益之稱舜曰：夔夔齋慄，瞽

亦允若則舜之為庶人既已能順其親使不至於姦矣
父子相賊姦之大者也豈有既已用之而猶欲殺之哉

履祥按瞽瞍之欲殺舜也象之欲殺兄也史記曰舜
母死瞽瞍更娶妻而生象象傲瞍愛後妻子常欲殺
舜也然瞽瞍特出於愛憎而舜又非有大過惡何至
欲殺之哉嘗考其情則虞氏自幕故有國至瞽瞍亦
無違命則粗能守其國者也其欲殺舜蓋欲廢嫡立
幼而象之欲殺其兄亦欲奪嫡故爾不然豈以匹夫
之微愛憎之故而遽欲殺之哉然則舜固有國之嫡
而其為耕稼陶漁之事何也曰古之國家子弟固非
如後世之豢養舜之為田漁而人從之又非必如今
之漁人陶工也或者見逐於父母故勞役之或避世
嫡不敢居而自歸於田漁亦因是以行其政教而濟
時之窮故雜書有謂舜見器之苦惡而陶河濱見時

之貴糴而販負夏孔子曰耕漁陶販非舜事也而往
為之以救敗爾此說雖出雜書而實得聖人之意又
瞽象之欲殺舜在其初年之間而堯之舉舜則在其
克諧之後史記反覆重出而莫之辯固也然孟子當
時亦不辯萬章之失何也蓋孟子不在於辯世俗傳
訛之迹而在於發明聖人處變之心務使學者得聖
人之心以推天理人倫之至則其
事迹之前後有無皆不必辯矣

六十有一載洪水咨四嶽舉鯀俾乂

帝曰咨四嶽湯湯洪水方割蕩蕩懷山襄陵浩浩滔天

下民其咨有能俾乂

四嶽者掌四方方嶽之官古者大事則咨四嶽使詢訪四方之言也

方割始為害也懷山襄陵叙其實也浩浩滔天言其勢也滔天當時方言云爾滿望皆水而天影其中若滔天

然僉曰於鯀哉帝曰吁咈哉方命圯族嶽曰异哉試可

乃已

僉曰者四嶽以衆言告也鯀有崇伯也方命舊說逆命史作負命按堯典上文方鳩方割皆作方始

之義則此當云我始命為他職時即敗羣自用則治水大任弗可為也圯族猶詩言敗類嶽曰者上舉衆言此因獨對异義未詳列子註及柳文與異字同言但用其才可以治水則已不必病其圯族也

帝曰往

欽哉

帝順衆言而使之往復云欽哉以救其失蓋能敬謹則必不圯族自恃而事功成矣

六十有九載鯀績用弗成

九載績用弗成。程子曰治水天下之大任也非其至公之心能捨已從人盡天下之議則不能成其功豈方

命圮族者所能哉。鯀雖九年而功弗成，然其所治固非他人所及也。惟其功有緒，故其自任益強，弗戾圮族，益甚。公議隔而人心離矣。是其惡愈顯而功卒不可成也。

履祥按：周漢以來，諸史多稱堯有九年之水。今考其時，自洪水方割，即舉鯀，俾乂九載無成，而後舉舜。又二三年始舉禹，禹八年於外而始告成功。前後計二十餘年矣。而曰九年者，蓋指鯀九載之間也。計自方割以來，洪水之害無歲無之。如後世歲有河決之患，鯀於其間多為隄防以障之，而患日滋甚。孟子叙泛濫之禍，在舉舜敷治之上，則九年之云，蓋謂此時也。然洪水之害一日不可緩，而待鯀九載無功，始易之何也？傳稱禹能修鯀之功，則九載之間非盡無功，但無成耳。而三考黜陟之典，不可廢。是以有羽山之貶。

馬或曰僉之舉鯨也方命圯族帝已知之矣知而使
之何與蓋為天下擇人天下之公也當是時舜禹未
興在廷諸人固皆舊德乃若其才則無出鯨之右者
人皆知鯨之才足以集事惟聖人知其剛悻違衆易
於敗事爾帝將戒其所短以用其所長則曰欽哉以
勉之夫欽者心法之要萬事之所由成也以鯨之才
加之敬謹何患無成惟其棄帝之命忽不務此是以
輕視愎言訖潰于成然則帝固將全鯨之才而鯨則
棄帝之命矣天下之以才自負而忽不加謹祇以取
敗者皆是也寧獨鯨哉又按經稱鯨堙洪水傳稱鯨
障洪水國語又稱其墮高堙卑經稱禹決九川孟子
稱禹疏九河濬濟漯決汝漢掘地而放之海然則鯨
之治水也障之禹之治水導之也其成敗之由以此
當其在鯨也禹何以不諫曰禹安得不諫以鯨之方
命圯族况其子之言乎故禹必有諫鯨必有所不從
舜之知禹亦必以此舜之罪也殛鯨其舉也興禹大

公之道聖人無容心焉抑絲既以方命圮族失之禹念父功之未就於是暨益暨稷思日孜孜以成之非惟克勤于邦以為忠而補前人之愆以濟天下乃所以為大孝也然以禹之聖猶八年於外何也禹八年之間非但導水濬川而已中間畫井田為溝洫定經制酌土宜立賦法通朝貢廣教化於八年之間定千萬世之計此禹之功所以為不可及也

七十載舉舜登庸

帝曰疇咨若時登庸放齊曰胤子朱啟明帝曰吁嚚訟

可乎

登庸之命不言所職帝之意固有在矣朱丹朱也放齊以嗣子朱為對啟明者謂其才智之開明也

朱之為不肖也亦以此朱子曰此下為舉舜張本

帝曰疇咨若予采驩兜曰都

共工方鳩僝功帝曰吁靜言庸違象恭

今本滔天二字下文之衍孔穎

達曰經三言衆人未必一時之事但歷言朝臣不賢為求舜本也

○帝曰咨四嶽朕在

位七十載汝能庸命巽朕位岳曰否德忝帝位

巽八也使入居

帝位也或曰

巽與遜同

曰明明揚側陋師錫帝曰有鰥在下曰虞

舜師錫四岳以衆議對也錫予也以衆言對而曰錫重之也薦聖人於帝此天子也安得不重為之辭老而

無妻曰鰥舜三十未娶而即曰鰥古者聖人繁育人民三十而娶者期之極也至此而未娶即鰥也書大傳曰

父頑母嚚而不見室

帝曰俞予聞如何

予聞者已知其人也如何者更

家之端故謂之鰥

詳其實也以舜之玄德年二十而聞於天下以堯之明思天下固無遺照也然聞之而不自舉之蓋為天下擇

人必盡天下之議聖人見大心平
大公無我意象於此可想見也

岳曰瞽子父頑母嚚

象傲克諧以孝烝烝乂不格姦

舜處頑嚚之下非可以諫諍回父母之心非可

以言語喻父母於道加之傲狠之弟又豈聲音笑貌可以得其歡心哉克諧以孝烝烝乂是蓋真誠之克積和氣之薰烝也不格姦則衆亦不至於為惡矣家難而天下易觀諸克諧烝烝之氣象則舜治天下神化之功用於此可見矣

帝曰我其試哉女于時觀厥刑于二女釐降二

女于媯汭嬪于虞帝曰欽哉○孟子曰堯之於舜也使
其子九男事之二女女焉百官牛羊倉廩備以養舜於
畎畝之中後舉而加諸上位故曰王公之尊賢也舜尚

見帝帝館甥于貳室亦饗舜迭為賓主是天子而友匹

夫也

按荀子莊子皆有堯舜問答之辭胡氏大紀亦取之然疑信相半今不取

履祥按史稱黃帝之曾孫譽譽之子堯則堯黃帝之
玄孫也又稱黃帝生昌意昌意生顓頊歷窮蟬敬康
句望橋牛以至瞽瞍而生舜則舜黃帝八世孫也堯
舜俱出於黃帝則二女之妻不亦亡宗續姓亂序無
別已乎或曰晉胥臣曰黃帝之子二十五人得姓者
十四人為十二姓其同姓者二人而已異姓則異德
異德則異類異類雖近男女相及以生民也又記曰
繫之以姓而弗別雖百世而婚姻不通者周道然也
然則古已別姓則婚姻不可以通乎曰非也黃帝氏
十四人之得姓猶高陽高辛氏之十六族爾胥臣之
言為納懷羸故附會而言非正也禮記之言用周道
以正諸侯之失也皆非此之謂也世系之傳史記之

失考也昔者歐陽氏固論之矣見六一文集且司馬
談遷漢史也其紀漢之初已不知高祖之世系於父
曰太公而猶不知其名母曰劉媪而猶不知其氏而
其上紀五帝之世母妻嫡庶子孫名氏一無所遺耳
目所及尚如此則二千餘年所傳聞者其詳尚足信
乎或曰世本也非談遷之所自言也抑世本又豈果
出於三代之時乎以世本為三代之書猶以爾雅為
周公之書也縱使果出於三代之季則周衰傳說已
不可信故朱子謂世本或出於附會假託不可憑據
今以其叙舜之世推之其不可憑也審矣曰然則舜
果何出乎考之於書曰虞舜曰嬪于虞是虞者有國
之稱也參之國語史伯之言曰成天地之大功者其
子孫未嘗不章虞夏商周是也虞幕能聽協風以成
樂物生者也夏禹能平水土以處庶類者也商契能
和合五教以保于百姓者也周棄能播殖穀蔬以衣
食民人者也其後皆為王公侯伯夫以虞幕竝契稷

而言則幕為有功始封之君虞為有國之號而舜所
自出以王天下者也考之左氏史趙之言曰自幕至
于瞽瞍無違命舜重之以明德夫自幕以至於瞽瞍
則非自黃帝昌意顓頊窮蟬敬康句望橋牛以至瞽
瞍也或曰然則昌意窮蟬以下之說固妄矣國語不
曰幕能帥顓頊乎左氏不曰陳顓頊之族乎曰幕之
出於顓頊左氏國語之說固足徵也然謂顓頊之必
出於黃帝史記之說其果足徵乎黃帝氏歿則少昊
氏作是為五帝之首國語稱少昊氏之衰九黎亂德
顓頊受之則少昊似一代之通稱後世始衰非少昊
帝之世即衰也而史記於黃帝之後不及少昊懸紀
顓頊指為黃帝之孫隔遠無序少昊之代何所往而
黃帝之孫何其壽也莫難明者譜牒莫易知者朝代
史記序朝代尚有遺則其序譜牒豈足信乎夫顓頊
未必黃帝之孫則五帝豈必皆黃帝之後伏羲神農
黃帝是為三皇皆有功德於天下果如史記五帝三

王皆黃帝之後則伏羲神農子孫何以皆無帝王者
商周猶曰世遠也若顓頊高辛陶唐皆黃帝後則一
家伯仲子孫遞相傳授又何必殊徽號易五運後世
又何必曰五帝官天下云哉況少昊氏上與伏羲聯
曰太皞少皞不必廢少昊為黃帝之青陽顓頊氏下
與帝嚳氏對曰高陽高辛不必附帝嚳為顓頊之族
子也古之王者必有庶子之官蓋公卿大夫之子凡
天下之俊秀與天子之子遊焉學焉者則十四人為
十二姓焉又不必皆為黃帝之子也若曰皆黃帝之
子則有姓無姓何其偏同姓異姓何其雜也上古之
時有同產而為夫婦者帝高陽投諸海外之野而不
之齒況一父之子各易其姓而遠使之男女相及是
率天下而為悖棄人倫也豈理也哉書稱帝堯克明
俊德以親九族使堯舜果同出於黃帝如史記之世
系則堯之視舜為同高祖之族為羣從玄孫之行正
九族之內也舜在九族之內為父母弟所惡屢瀕於

死耕稼陶漁而堯不一顧省豈足謂之親睦九族迨四岳明揚又直妻以二女豈足謂之克明俊德以天下之大聖人操化導之權豈不先定其名分則史記世本誣陷聖人之罪不可勝誅矣然則堯舜之不同出於黃帝以書決之書無明文以堯之妻舜決之也或者又曰堯舜之不同出黃帝若前所云固決矣傳稱有虞氏禘黃帝而郊嚳祖顓頊而宗堯何也曰此亦小戴收國語之言而又失之者國語論禘郊祖宗皆以其有功於民而祀之初不論其世也故注者謂虞以上尚德夏以下親親戴氏祭法易其前後故讀者不覺耳此朱子固嘗言之矣無已則又決之於書乎書稱舜格于文祖即受終于堯之祖也稱禹受命于神宗即舜宗堯之廟也其禘黃帝其郊嚳即宗堯之意爾是以有虞子孫猶郊堯而宗舜以天下相傳則有天下之大統焉有虞氏受堯之天下則宗堯宗堯則禘郊堯之宗祖計堯以前亦或有然者矣況國

語固云禘郊祖宗與報為五則禮固有竝行而不相悖者近世有為之說者曰祖考來格虞賓在位此有虞祭顓報幕以至瞽瞍之祖考也胡氏大意國語所謂祖顓頊與有虞氏報焉者也禘黃帝郊嚳宗堯書所謂文祖神宗舜受堯之天下故宗堯為宗而祖堯之祖也路史大意大傳所謂帝入唐郊以丹朱為尸者也祖顓頊報幕以至瞽瞍者一家之私親也禘郊宗堯者天下之公義也然韶之為樂正以紹堯而得名則祖考來格者即文祖神宗之謂而虞賓在位者安知非丹朱之在尸位乎况禘郊祖宗報五者各有所尊自不相厭而虞賓之位亦不相妨也故曰以下相傳則有天下之大統焉至商周以征伐革命始與古異而諸儒之論亦始膠矣

慎徽五典納于百揆

慎徽五典五典克從納于百揆百揆時叙○左傳太史克曰昔高陽氏有才子八人蒼舒隤斨擣戴大臨危降庭堅仲容叔達齊聖廣淵明允篤誠天下之民謂之八愷高辛氏有才子八人伯奮仲堪叔獻季仲伯虎仲熊叔豹季狸忠肅共懿宣慈惠和天下之民謂之八元此十六族也世濟其美不隕其名以至於堯堯不能舉舜臣堯舉八愷使主后土以揆百事莫不時叙地平天成舉八元使布五教于四方父義母慈兄友弟恭子孝內

平外成故虞書數舜之功曰慎徽五典五典克從無違

教也納于百揆百揆時叙無廢事也

高陽顓頊也氏謂其朝代才子謂高

陽氏之世其故家遺族也高辛氏才子之云亦然故總謂之十六族或者不知遂真以為二帝之子則高陽八子何其壽而高辛氏之八子豈果堯之庶弟與

賓于四門流凶族殛鯀于羽山放驩兜于崇山

莊子釋文謂堯六十年放驩兜于崇山六十四年流共工于幽都六十六年竄三苗于三危按賓于四門舜歷試之時鯀考績弗成之明年也鯀無成功舜臣堯舉黜幽之典於是羽山之貶驩兜之比周罔上亦並黜之至於三苗就竄疑未能若是速也所以書叙四罪總於攝位之

季太史克以舜賓四門殛鯀放驩兜故併以流四凶族繫之爾事之前後舊必有考然四罪之行皆堯七十載舜登庸之後非六十年間事也意者六字之訛與今追正其訛繫之七十年以後

賓于四門四門穆穆。○左傳太史克曰舜臣堯賓于四門流四凶族渾敦窮竒禱杌饕餮投諸四裔以禦螭魅

螭魅山林異氣所生為人害者古者聖人為民驅其龍蛇惡物而處之平土故四裔無人之境螭魅聚焉故

虞書曰賓于四門四門穆穆無凶人也。○程子曰四凶之才皆可用堯之時聖人在上皆以才任大位而不敢

露其不善之心堯非不知其不善也伏則聖人亦不得而誅之及帝舉舜於匹夫之中而授之位則是四人者始懷憤怨不平之心而顯其惡故得以因其迹而誅竄之也

履祥按太史克叙四凶之辭疑多溢惡蘇氏古史亦謂左氏所言皆後世流傳之過今故畧之

七十有二載舜納于大麓使禹平水土益掌火

棄教民播種契為司徒

書叙納于大麓為舜歷試之終事今係之歷試

之三年薰繇以七十載殛死至是禹三年之喪畢而舜舉之大紀命禹益棄皆係之此年今

從之或曰此時方舉禹則鯀殛之後禹未舉之前三年之水孰治之與太史克固曰舉八愷使主后土矣但不如舉禹之專掌爾○一云納于大麓蓋納于泰山之麓使之主祭也烈風雷雨弗迷百神享之也蓋堯時曾有風雷之變使舜禱之泰山而息也按淮南子外紀亦言堯有大風之變今不敢信用且依史記蘇氏之說

納于大麓烈風雷雨弗迷○淮南子曰四岳舉舜而薦之堯堯妻以二女以觀其內任以百官以觀其外既入大麓烈風雷雨而不迷○太史公曰堯使舜入山林川澤暴風雷雨舜行不迷○蘇氏曰洪水為患堯使舜入

山林相視原隰雷雨大至衆懼失常而舜不迷其度量
有絕人者而天地鬼神亦或相之與○孟子曰天下之
生久矣一治一亂當堯之時天下猶未平洪水橫流汜
濫於天下草木暢茂禽獸繁殖五穀不登禽獸偪人獸
蹄鳥跡之道交於中國堯獨憂之舉舜而敷治焉舜使
益掌火益烈山澤而焚之禽獸逃匿禹疏九河淪濟漯
決汝漢排淮泗然後中國可得而食也當是時也禹八
年於外三過其門而不入后稷教民稼穡樹藝五穀五

穀熟而民人育人之有道也飽食煖衣逸居而無教則
近於禽獸聖人有憂之使契為司徒教以人倫父子有
親君臣有義夫婦有別長幼有叙朋友有信放勳曰勞
之來之匡之直之輔之翼之使自得之又從而振德之

履祥按洪水之為患也堯使舜治之舜於是使益掌
火禹敷土稷教稼穡矣舜使禹治之禹於是暨益奏
鮮食暨稷奏艱食矣二聖人之規模其視鯨之方命
圮族者不其相遠乎故觀書者必得聖人之規模焉
又按孟子稱天下之生一治一亂則是氣化消息固
有定勢矣獨不闕諸人事與曰朱子固曰氣化盛衰
人事得失反覆相尋理之常也大抵氣化有盛則必
有衰人事處盛則必有失此一治所以一亂也氣衰

則必復盛人事失則必復變此一亂所以一治也惟聖人在上則能以道御氣治制亂此所以常盛常治而無衰亂也古今之言堯舜者皆曰極治之時而不知帝堯乃善制亂之主何則帝堯治天下天下雍熙者至是六十餘年氣化可謂極盛天下可謂極治矣盛則必衰惟其人事無致亂之因故散而為子朱之不肖洪水之橫流四罪在朝聖人在下是亦一亂矣惟帝堯善於制亂故水之為災也則敷治子之不肖也則與賢舜禹並興四罪終去所以處亂而迄不害其為治也然則世皆以堯為極治之主愚獨謂堯舜皆善治亂之君後之為君者無徒曰氣數云

丙辰七十有三載薦舜於天舜受終于文祖

帝曰格汝舜詢事考言乃言底可績三載汝陟帝位舜

讓于德弗嗣帝曰咨爾舜天之歷數在爾躬

不允其讓也允

執其中

授之以治天下之道也

四海困窮天祿永終

戒之也子王子曰堯之試

舜如此之詳而讓德弗嗣之下無再命之辭異位之際亦無叮寧告戒之語何也按論語堯曰篇首二十四字乃二典之脫文也

正月上日受終于文祖

堯老而舜攝也堯終其事而舜受之也

在璿璣玉衡以齊七政

以玉為璣以象天體之運轉以璿珠飾之以象星辰之位次以

玉為橫笛推其分度時節以窺天而與璣合義和之法至是益密後世渾天儀象蓋其法也朱子曰渾天說曰天之形狀似鳥卵地居其中天包地外猶卵之裹黃圓如彈丸故曰渾天其術以為天半覆地上半在地下其地居地上見者一百八十二度半強地下亦然北極出地上三十六度南極入地下亦三十六度而嵩高正當

天之中極南五十五度當嵩高之上又其南十二度為
夏至之日道又其南二十四度為春秋分之日道又其
南二十四度為冬至之日道南下去地三十一度而已
是夏至日北去極六十七度春秋分去極九十一度冬
至去極一百一十五度此其大率也其南北極持其兩
端其天與日月星宿斜而廻轉此必古有其法遭秦而
滅漢武帝時洛下閎鮮于妄人始經營量度之宣帝時
耿壽昌始鑄銅而為象宋錢樂又鑄銅作渾天儀銜長
八尺孔徑一寸璣徑八尺圓周二丈五尺強轉而望之
以知日月星辰之所在即璿璣玉衡之遺法也歷代以
來其法漸密本朝因之為儀三重其在外者曰六合儀
平置黑單環上刻十二辰八干四隅在地之位以準地
面而定四方側立黑雙環背刻去極度數以中分天春
直跨地平使其半出地上半入地下而結于其子午以
為天經斜倚赤單環背刻赤道度數以平分天腹橫繞
天經亦使半出地上半入地下而結於其卯酉以為天

緯三環表裏相結不動其天經之環則南北二極皆為圓軸虛中而內向以挈三辰四遊之環以其上下四方於是可考故曰六合次其內曰三辰儀側立黑雙環亦刻去極度數外貫天經之軸內挈黃赤二道其赤道則為赤單環外依天緯亦刻宿度而結於黑雙環之卯酉其黃道則為黃單環亦刻宿度而又斜倚於赤道之腹以交結於卯酉而半入其內以為春分後之日軌半出此外以為秋分後之日軌又為白單環以承其交使不傾墊下設機輪以水激之使其日夜隨天東西運轉以象天行以其日月星辰於是可考故曰三辰其最在內者曰四遊儀亦為黑雙環如三辰儀之制以貫天經之軸其環之內則兩面當中各施直距外指兩軸而當其要中之內面又為小窳以受玉衡要中之小軸使衡既得隨環東西運轉又可隨處南北低昂以待占候者之仰窺焉以其東西南北無不周徧故曰四遊此其法之大畧也儀禮經傳通解厯象篇曰混天儀唐貞觀中李

淳風為之開元中浮屠一行梁令瓚又為之宋太平興國中張思訓創為元祐中蘇頌更造其法尤密置渾儀於上以仰觀置渾象於下以俯視樞機輪軸軸隱於中以水激輪則儀象皆動不假人力 肆類于上

帝禋于六宗望于山川徧于羣神

朱子曰類禋望皆祭名類謂非常祀而祭

告于天其禮依郊祀為之上帝天也禋精意以享之謂宗尊也所尊祭者其祀有六祭法曰埋少牢於泰昭祭時也相近於坎壇祭寒暑也王宮祭日也夜明祭月也幽宗祭星也雩宗祭水旱也山川名山大川五嶽四瀆之屬望而祭之故曰望羣神謂丘陵墳衍古昔聖賢之類言受終觀象之後祭祀以攝位告也 輯五瑞

既月乃日覲四岳羣牧班瑞于羣后

合五等諸侯朝攝于都各執命圭璧

為信以合符于天子盡正月皆至於是日日覲見四岳九牧以察問五等諸侯之政班還其命圭璧如新受命

也

七十有四載巡狩

舜以攝位初年輯五等諸侯
盡正月皆至其二月乃日日

覲四岳羣牧考察諸侯以還其瑞則二月未暇
巡狩也故逾歲而巡狩今附于攝位之明年

歲二月東巡狩至于岱宗柴望秩於山川

禮記作柴而
望祀山川蓋

古者祭山埋之祭川沈之今於東嶽之下祀東嶽而及
東方山川不能徧埋沈也故柴而望祭取其氣之旁達
也舊說柴句謂燔柴以祭天古者祭天必於郊有大事
特告則放郊禮而謂之類天子將出類於上帝未聞至
岱宗而始祭告也餘三岳皆如岱禮則一歲巡狩而
四祭天不已瀆乎當從禮記以柴望秩于山川為句

覲東后五玉三帛二生一死贄

五玉至贄舊在修五禮
之下朱子謂當在覲東

后之下蓋東方五等諸侯及公侯之子附庸之君與卿大夫命士贄見之儀等也聖人制為覲享之禮五玉三帛二生一死皆取服食器用而已古時多玉故公侯以玉為贄以共天子之器用賜予古者玄衣纁裳黃亦為裳故侯之世子執纁公之孤執玄附庸之君執黃以共衣服卿羔大夫雁士雉以共飲食也羔羊舒鴈二物皆可以生得士異於庶人故執雉取其文也而雉不能生得故必死者為贄可以見聖人制禮詳密而簡易也如此

此 協時月正日同律度量衡修五禮如五器卒乃復子

朱

曰時謂四時月謂月之大小日謂日之甲乙諸侯之國有不齊者則協而正之也同審而一之也律謂十二律黃鍾太簇姑洗蕤賓夷則無射六律為陽大呂夾鍾仲呂林鍾南呂應鍾六呂為陰凡十二管皆徑三分有奇空圍九分而黃鍾之長九寸大呂以下律呂相間以次而短至應鍾而極焉以之制樂而節聲音則長者聲下

短者聲高下者則重濁而舒遲上者則輕清而剽疾以之審度而度長短則九十分黃鍾之長一為一分而十分為寸十寸為尺十尺為丈十丈為引以之審量而量多少則黃鍾之管其容子穀秬黍中者一千二百以為龠而十龠為合十合為升十升為斗十斗為斛以之平衡而權輕重則黃鍾之龠所容千二百黍其重十二銖兩龠則二十四銖為兩十六兩為斤三十斤為鈞四鈞為石此黃鍾所以為萬事根本諸侯之國其有不一者則審而同之也時月之差由積日而成其法則先粗而後精度量衡受法於律其法則先本而後末故言正日在協時月之後同律在度量衡之先立言之叙蓋如此也五禮吉凶軍賓嘉也修之所以同天下之風俗如同也五器即五禮之器卒乃復者舉祀禮覲諸侯一正朔同制度修五禮如五器數事皆畢則不復東行而遂西向且轉而南行也今按如五器即禮記所謂考制度衣服正之之類是也

五月南巡狩至于

南嶽如岱禮八月西巡狩至于西嶽如初十有一月朔

巡狩至于北嶽如西禮歸格于藝祖用特

朱子曰南嶽衡山西嶽華

山北嶽恒山二月東五月南八月西十一月北各以其時也格至也言至于其廟而祭告也藝祖疑即文祖或曰文祖藝祖之所自出未有可考特特牲也謂一牛也古者君有出必告于祖禰歸又至其廟而告之孝子不忍死其親出告反面之義也王制曰歸格于祖禰鄭注曰祖下及禰皆一牛程子以為但言藝祖舉尊爾實皆告也但止就祖廟共用一牛不如時祭各設主於其廟也二說未知孰是今兩存之

羣后四朝敷奏以言明試以功車服以庸

林氏曰天子巡狩則有協

時月以下等事諸侯來朝則有敷奏明試以下等事

○文中子曰舜一歲而巡四

嶽兵衛少而徵求寡也

履祥按李氏心傳辨周禮五嶽謂周都豐鎬則華山乃中嶽嵩高不得為中嶽據爾雅河西嶽河南華河東泰江南衡則嶽山乃西嶽而華乃中嶽爾崧高之為中嶽蓋東遷之後也今以此說推之禹貢冀州自有泰嶽今猶謂之霍太山則堯都冀州蓋以泰嶽為中嶽爾雅河西嶽周禮雍州其山鎮曰嶽山即禹貢岍山一名嶽山又名吳嶽今在隴州者是也然則唐虞五嶽當以岍為西嶽泰嶽為中嶽而東岱南衡北恒爾衡山最遠黃帝以潛霍為山之副然則秦以岍為西嶽漢武徙衡山之神於霍山歷代加封岍山多以西嶽為言蓋有自來矣虞書獨東嶽稱岱宗而南西北三嶽不名蓋當時巡狩四嶽取肆覲羣后道里之宜爾不必拘於嵩華之為嶽也敢因李氏之言以傳其疑

流共工於幽洲

流共工於幽洲

幽洲北裔也當是遼東之地

七十有六載竄三苗于三危

竄三苗于三危

西裔也隋書曰党項羌者蓋三苗之後也其種有宕昌白狼皆自稱獼猴種東

接臨洮西平西接葉護南北數千里三危山名舊云沙洲燉煌縣東四十里卑兩山是然三危乃因山以名其地不必拘曰居此山也

○呂刑曰若古有訓蚩尤惟始作亂延及

于平民罔不寇賊鴟義姦宄奪攘矯虔苗民弗用靈制以刑惟作五虐之刑曰法殺戮無辜爰始淫為劓刵椽

黥越茲麗刑并制罔差有辭民興胥漸泯泯焚焚罔中
于信以覆詛盟虐威庶戮方告無辜于上帝監民罔
有馨香德刑發聞惟腥皇帝哀矜庶戮之不辜報虐以
威遏絕苗民無世在下乃命重黎絕地天通罔有降格
○楚語曰少皞之衰也九黎亂德民神雜糅不可方物
夫人作享家為巫史無有要質民瀆齊盟無有嚴威禍
災荐臻顛頊受之乃命南正重司天以屬神火正黎火當
北作司地以屬民使復舊常無相侵瀆是謂絕地天通其

後三苗復九黎之德

履祥按諸儒言書者稱苗民繼蚩尤之暴而楚語稱三苗復九黎之德孔安國遂謂蚩尤為九黎之君夫蚩尤炎帝之末諸侯也九黎少昊之末諸侯也其時相去遠矣孔氏合而言之故說者疑辯特詳然皆不得書之意夫呂刑之書為訓刑作也則推所以立刑之由楚語觀射父為絕地天通而言也則推巫鬼之由推立刑之由則本蚩尤之為亂推巫鬼之由則述九黎之為昏上古之世其民淳朴在下無罪在上無刑至蚩尤始為亂延及平民無不寇賊鴟義姦宄奪攘於是聖人矯正而虞劉之此刑之所為作也刑以制亂非有國者所尚也不得已而後用之爾而有苗遂並刑以為虐民始有不得其生者矣於是罔中于信以覆詛盟而巫祝之事興焉巫祝之事蓋九黎之遺習也呂刑楚語所指不同學者多合而言之其失

久矣

象以典刑流宥五刑鞭作官刑扑作教刑金作贖刑青

災肆赦怙終賊刑欽哉欽哉惟刑之恤哉

朱子曰象如天之垂象示

人典常也示人以常刑所謂墨劓剕宮大辟五刑之正也所以待夫元惡大憝殺人傷人穿窬淫邪凡罪之不
可宥者也流流遣之使遠去宥寬也所以待夫罪之稍
輕雖入於五刑而情可矜法可疑與夫親貴勲勞而不
可加以刑者則以此而寬之也鞭木末垂革官府之刑
扑夏楚學校之刑皆以待夫罪之輕者也金罰其金也
贖贖其罪也所以待夫罪之極輕雖入於鞭扑之刑而
情法猶有可議者也此五句者寬猛輕重各有條理法
之正也肆縱也青謂過誤災謂不幸若人有如此而入
於刑則又不待流宥金贖而直赦之也怙謂有恃終謂

再犯若人有如此而入於刑則雖當宥當贖亦不許其宥不聽其贖而必刑之也此二句者或由重而即輕或由輕而即重盖用法之權衡所謂法外意也聖人立法制刑之本末此七言者大畧盡之矣雖有輕重取舍陽舒陰慘之不同然欽哉欽哉惟刑之恤之意則未始不行乎其間也盖其輕重毫釐之間各有攸當者乃天討不易之定理而欽恤之意行乎其間則可以見聖人好生之本心也

兜于崇山竄三苗于三危殛鯀於羽山四罪而天下咸

服書叙四罪在舜攝位之末盖作書者紀舜象刑之法與其恤刑之意因記二十八年之間所刑者四人而已外是無刑者是則因而係諸典刑之下非攝位季年之事也若果季年之事則崇鯀羽山之殛稽諸於三考之後而追罪於三十年之餘也且是時禹已成功而罪鯀人情之必不然者而謂聖人為之乎

八十載禹告成功

按孟子稱禹八年於外而唐虞之法九載三考大紀載禹成功於八十一載之間蓋自七十二載舉禹至是九年矣其後夏史叙禹之功是為禹貢之書今附于此云史記漢史皆稱禹治水十三年蓋本作十有三載乃同之文此特兗州貢賦始同爾禹貢夏史之追書故及十有三載之事其實告成則在此年也

禹貢

夏史叙禹平水土之功總以貢名識其成也每州有賦有貢有篚而貢則夏后氏田賦之總名也故

以為名禹貢叙水土之事在唐虞之際禹謨叙功謨之事則在有虞之時舊皆名夏書以夏史之所述也夫子定書升禹謨於虞書以著三聖相傳之道禹敷土隨山冠禹貢於夏書以明大禹有天下之本也

刊木奠高山大川

敷如敷治之敷有布置周徧之義禹治九州非一手足之為烈亦布置規

畫之有道耳隨山刊木禹功之始奠高山大川禹功之終其始洪水泛濫草木繁興禽獸逼人種藝無地禹於是隨山刊木使益掌火烈山澤而焚之秦庶鮮食且使民居高種藝以給粒食又以升高望遠規畫疏導其後懷襄之患悉定則又定其高山大川以為每州表鎮望祀之典焉此禹功之終也又古者州域既廣國小而多地無定名凡禹貢所書山川皆因山以名其地非謂專導其山也此讀禹貢之凡例今表見於此云冀州冀為帝都故為九州之首不言所至春秋王者無外之義也九州豫為中帝畿實跨冀豫然自唐虞都冀天下遂指冀為中州如楚詞謂中州為冀州是也聲教自冀四達則自冀以北所及固廣矣此異日并幽所以分也冀之為州三面皆河水患特甚蓋河自崑崙東北流阻陰山一帶則折而南流為冀西河至華陰又折而東流為冀南河至大伾折而北流為冀東河自西河出孟門之上南河壅砥柱之西東河旋淤大陸之野此冀州水

患所以為甚也而究在冀東又為下流之衝故先冀而
 及究自禹載壺口治梁岐闢龍門疏砥柱豬大陸而冀
 之患息播為九河使之北流醜為濼潔使之東殺通于
 淮泗使之甚則可以南泄於是究之患平而青徐次第
 皆平矣冀州之境今之河東
既載壺口
 載始事也壺口
 燕雲遼西河北四路皆是
 山名在今隰州

吉鄉縣冀雍之交夾河而南皆山也壺
 口蓋受河之口龍門則河南出之門也
治梁及岐
 梁山

也在今石州離石縣北呂不韋謂呂梁未闢河出孟門
 之上春秋梁山崩傳謂壅河三日不流水經注謂呂梁

之山巖屨岫紆澗曲崖深巨石崇竦壁立千仞河流激
 盪震天動地蓋大禹所闢以通河也孟門亦在石州今

有孟門闕岐狐岐山也在今汾州介休縣勝水所出統
 為西山古河逕之險阨治二山以廣河道也舊說雍之

梁岐者非九州凡山之言治者或水道之衝有疏闢之
 功也或表山以該水土也言藝者剪其蒨鬱與民種藝

也傳所謂以啟山林也言旅者祭之以為其州既修太
之鎮望記所謂民所瞻仰取材出雲為雨者也

原至于岳陽

修治也記曰禹能修繇之功蔡氏謂因其
舊而修之也太原在今太原府榆次縣鄭

漁仲謂乃今平定軍按平定軍亦本以太原府廣陽樂
平二縣置爾雅高平曰原河東視天下最高率多山險
今太原府亦險阻但榆次與平定諸處為高平爾嶽即
秦嶽今晉州霍邑縣霍太山也山南曰陽今晉州岳陽
縣也汾水出太原諸山經晉州蔡氏謂此條為治汾水
而言然禹經理水土濬畎澮畫井疆物土宜凡事蓋並
手皆作不

覃懷底績至于衡漳

覃大也懷地名太行為
河北春其山脊諸州皆

獨汾也

山險至太行山盡頭地始平廣田皆腴美俗謂小江南
古所謂覃懷也即今懷州其地亦有懷水入河衡漳即
今漳河有兩源其一出今平定軍樂平縣少山者曰清
漳其一出潞州長子縣發鳩山者曰濁漳沈存中謂凡

二水合流而有文者皆名漳酈道元以濁漳為衡水以清漳東南流而濁漳橫入之也按唐志冀州以衡水名縣而漳水在縣治之南一里洺州舊清漳名縣而其地有衡漳瀆則非二名也漳河本入河自河徙之後漳自至今滄州清池縣入海唐時有請以漳水備四瀆者以其獨達于海也○禹治冀州載壺口治梁岐則冀之西河患息修太原至岳陽則冀之中郊甸治覃懷底績至衡漳則冀之東南水土平至於恒衛島夷則冀之東北皆可知矣此神禹厥土惟白壤此辯地也白其色也無塊曰壤言其性也顏師治冀之次第也

古謂柔土曰壤周官大司徒辨十有二壤之名物而知其種以教稼穡樹藝而草人又有糞種之法亦因其色性而名異傳所謂先王物土之宜而制其利者也先王辯地教民不失其宜故五穀熟而民人育

厥賦

惟上上錯厥田惟中中

賦者田所出穀米兵車皆是也禹貢田賦上中下三分而三之

中又三之為九等以人功之有多寡也其實則皆什一諸州先田而後賦以賦之出於田也冀州先賦而後田以賦之不專出於田也冀為帝都地大人衆天子所自治鄉遂正軍羨卒必雄於外服粟米黍稷併與漆林雜物並征之亦不別立貢篚總其數之入為九州第一但聖人取民不盡其力又有時錯出於次等河東太行地勢全體皆石土載其上但壤恒衛既從大陸既作性柔細故其地為九州第五恒衛既從大陸既作

恒水出名出

恒嶽之北谷合于滹而入易衛出真定府靈壽縣古入

河今合于滹沱古書謂舜分衛水以北為并州又按滹

沱河出恒嶽諸谷而衛水與之合流恐恒衛既從即滹

沱為是大陸爾雅在九藪之數今邢州鉅鹿猶有廣河

澤唐杜佑李吉甫謂今邢趙深三州皆大陸之土按地

說大河北流過洺水千里至大陸為地腹蓋古河本

穿西山之麓以北流既出枯洺西山勢斷地勢平廣脊

上諸水鍾滙於此為藪河水泛溢又盤洄其間是為大

陸沈存中謂大陸皆濁泥所堙今為平土矣又按禹貢諸州山澤地水皆叙厥田之上貢篚包匭皆叙田賦之下未惟言入都水道耳冀為帝都不別出貢篚固矣而恒衛大陸復叙於田賦之下何也此非治水施功之例亦言入都水道因以見其成功爾蓋冀為帝都而自平陽四達甸服之外東北最遠又限以太行之脊其北境侯采則自恒衛入河其東偏則自大陸入河其東北島夷則自碣石入河也

島夷皮服夾右

碣石入于河

島夷海島之夷如朝鮮諸國蓋各居其地以為生不附庸于青而徑屬於冀者也其

貢皮服爾雅所謂東北方之文皮者夾旁行也右碣石負海之山也碣石有二故有左右之名舊以右為太行山之右非也右碣石在平州石城縣南舊為大河入海之處今河徙海淪碣石去岸五百里矣其山頂踵皆石頂又有大石如柱世名天橋柱云濟河惟兗州

濟古文作沛兗

其左碣石唐通典云在高麗界中

州西北界河東南跨沛其時黃河北流沛入河而南溢
以東又北東入海爾雅所謂沛河之間為兗州自周定
王五年河決而東漢孝文時河決東郡武帝元光中繼
決瓠子又決於館陶遂分為屯氏河元帝時大河分流
而屯河塞其後又決於平原而下流與漯一王莽末河
遂行漯川沛水亦不復南出後世代有河決之患其後
遂行沛水故道則兗州之境土無非河患淪徙之地漢
王橫言往者天嘗連雨東北風海水溢西南出浸數百
里九河之地已為海所漸則兗州之境北已海淪西又
河徙南則沛淤其川澤源委咸非其舊矣今河北東路
大名開德恩博德濱棣滄永靜京東之沛濮京
西之滑小海以東距于營平皆故兗之地也 九河既
道河至大伾折而北流則兗當其東又地平曠無高山
之限而當河勢之衝禹於是播為九河以殺其勢爾
雅所謂徒駭太史馬頰覆釜胡蘇簡潔鉤盤鬲津是也
言地理者多謂徒駭即滹沱在今滄州之清池馬頰鉤

盤在今德州之平昌胡蘇在今滄州之臨津覆釜在今瀛州之樂壽鬲津在今滄州之無棣簡即今大名之澗溝潔在今滄州之南皮按河自大伍北流過大陸以北方播為九而今於魏瀛德棣之間便求其故迹遠矣據王橫所言大風海溢即今小海碣石古河入海之處在今海中五百餘里則九河之地淪為小海久矣況自河徙之後經流既息

雷夏既澤

今濮州雷澤縣西北十五

枝流尚可尋乎

里計古雷夏必大於今

澠沮會同

晁氏曰爾雅水自河出為澠沮有楚音二水河沛之

別也然則河遷沛淤則澠沮不可復尋矣說者以為濮

耀二水古入雷澤一說澠即汭水張明謂禹開陰溝以

通河泗許氏謂汭受陰溝至蒙為澠水東入于泗即汭

也汭今作汭沮即今澠水首受蒙澤過應天今入南清

河古時黃河亦入此路但經稱會同

古當合入沛後世蕞之入淮入泗爾

桑土既蠶是降丘

宅土

克土宜桑後世所謂桑間亦一證也今水平桑長而蠶事興矣克土無山洪水則民居高丘今土平

而降邱宅土矣

厥土黑墳

墳謂土性起發也

厥草惟繇厥木惟條

九州

連舉惟克徐揚三州又入草木一條蓋三州皆東方下流之地洪水泛濫草木不生至是始繇茂條長也

厥

田惟中下厥賦貞作十有三載乃同

田第六賦第九貞字本下下字也古

篆凡重字者或於上字下添二克賦下下篆從下二或誤作正通為貞又篆文貞字作歪與下下相類因以致誤學者不知古文說多不通克地平下被害特甚水患雖平而水道居多人民鮮少蓋十有三年而治田興賦始同

厥貢漆絲厥篚織文

黑鹵之地宜漆桑土宜絲篚者幣帛之類以篚盛貢之織

文者織絲成文也

浮于濟潔達于河

此克入都水道也沛入河而南出故浮沛可以達河

史記禹釺二渠引河其一漯也薛氏謂古漯自今開德府朝城縣受河而東入海故浮漯可以達河西漢末河并行漯川其後河徙而漯亦不復存矣

海岱惟青州

故青州於中國為正東故名從東方之色其

地東北跨海西南距岱岱即泰山是名岱宗在今襲慶府奉符縣西北三十里其山特起東方為中國水口表鎮連延而生諸山北即原山汶出其西淄出其東東即蒙父為沂水諸源又東維山濰水所出西南即泗水所出青州之地即今青齊濟南淄濰登萊密東跨海西高麗北跨河西遼東但小海所淪則青之北境亦非全壤不獨克嶧夷既略首書嶧夷諸州無此例也但青州實州為然跨海而有東夷兼堯命義仲宅嶧夷以候正東之景故特表於前或云

濰淄其道

濰出今密州莒縣東

北濰山至濰州昌邑入海淄出今淄州淄川縣東南原山今入北清河

厥土白墳海濱廣

斤 濱古文作瀕青之土色白而性墳起其海瀕之地則
廣大而斤鹵可煮為鹽故齊有魚鹽之利今登州千

里長沙 厥田惟上下 九州冀田第一青徐即次之後世
是其地 所謂秦得百二齊得十二亦言其

地利之饒非獨形勢也 百 厥賦中上 田第三
二十二猶言百倍十倍 賦第四 厥貢鹽絺

海物惟錯岱畎絲枲鉛松怪石萊夷作牧 鹽廣斤所出
絺細葛布也

海物非一種皆雜貢之岱畎泰山之谷其所出絲枲
麻也鉛黑錫松泰山之名材怪石異石也如今萊之温

石可為器今青州黑山紅絲石紅黃相參文如林木或
如月暈如白峰如雲霞如花卉即古怪石也淄川梓桐

山石門澗石色若青金紋如銅屑理極細密亦奇石但
不如紅絲石之堅凡此諸品皆可為器用今取以為硯

萊夷萊山夷俗地宜畜牧亦取 厥篚檿絲 檿山桑也其
其畜以貢今萊州之東是其地 絲堅韌宜絃

琴瑟故篚以貢之一說通上文謂萊夷貢麋絲蓋今萊人猶謂之山繭云

浮于汶達于濟

汶水

出今襄慶府萊蕪縣原山古入沛今入北清河

海岱及

淮惟徐州

東至海北至岱南被淮今襄慶泗沂淮揚連水海鄆宿西接單陳蔡潁之地

淮沂

其又蒙羽其藝

淮出今唐州桐栢山行千七百里至海州入海徐之水以沂名者非一其出兗

州泗水縣尼丘山過魯城南入泗者曾點浴沂之沂也今海州沭陽縣有沂河口者周禮沂沭之沂也出沂州新泰縣艾山西南至淮陽下邳入泗者此沂為最大即禹貢之沂也蒙山在今沂州費縣羽山在今海州朐山縣藝種藝也淮沂之水既平

大野既豬東原底平

大野即鉅

野澤在今濟州鉅野縣唐鉅野屬鄆州石晉時混於梁山樂鄆今東平府即東原之地大野之水既豬則東原

之地底平厥土赤埴墳草木漸包埴細而粘若今陶器之泥

也漸包古厥田惟上中厥賦中中徐土粘埴而墳起故

文作薪包時生聚人工未厥貢惟土五色周書曰建太社于國中

及故賦第五其墳東青土南赤土西白土北驪土中央豐以黃土將

建諸侯則鑿取其方面之土包以黃土苴以白茅以為侯

社羽畎夏翟羽畎羽山之谷夏五色翟雉也左傳注南

山出夏翟山嶧陽孤桐嶧山在兗州鄒縣名鄒嶧山九

以此得名謂嶧陽者是山南曰陽孤桐者特生之桐也桐性虛特

生於山陽則清虛特異貢之以為琴瑟後世難得則取凡桐之舊者為之謂桐不百年則木之生氣不

盡木生氣盡而後能與天地陰陽之氣相應也泗濱浮

磬

泗水之濱浮生之石可以為磬如今硯石之取子石者蓋石根不著巖崖而自特生者故謂之浮今下邳

猶有石磬山乃其遺跡又宿州亦

淮夷蠙珠暨魚

淮出唐州

有靈壁石但浮生者不可得耳

其百餘里內尚淺而多潭有蠙珠潭今其地凡十四潭

而不復生珠矣魚即淮白魚若蠙珠玉磬古今風氣不

同蓋不

厥篚玄纈縞

玄黑赤色沈括謂今深紫類阜者是古人以為上衣纈黑經白緯者

縞素繒也記有虞氏縞衣而

浮于淮泗達于河

古文尚書作達

于荷說文引書亦作荷今俗本誤作河爾泗出兗州泗

水縣陪尾山有四源故謂之泗荷澤與沛水相連而泗

水上可以通荷下可以入淮徐州浮淮入泗自泗達荷

青州書達于沛則達河可知故徐州書達于荷則達沛

可知河沛泗淮在古必有相通之道禹所以殺河流使

之可以南泄通南北使之可以朝貢灌輸後世河徙而

南會于荷澤匯于鉅野分為南清河
并行于泗以入淮蓋亦其故道也

淮海惟揚州

北至淮東

南至海即今淮南江南東西
二浙之地福建廣東亦屬焉
彭蠡既豬陽鳥攸居

彭蠡今鄱

陽湖自洪宮亭受江西嶺北江東諸水在江饒南康興
國之間至江州湖口入江漢志所謂湖漢九水者即是
也禹豬彭蠡廢其旁地為蘆葦以備浸淫故陽鳥居之
陽鳥鴈也如漢築河隄去河各二十五里以防泛濫其
後民頗居作其間故河水漲溢之時動成漂沒以此知
神禹廢彭蠡之濱以居陽鳥其為民防患之意蓋深

三江既入震澤底定

震澤今太湖三江太湖之下三江入海者一說吳松江七十里分流

為三入海中為松江東南為東江北為婁江吳越春秋
所謂三江之口是也一說太湖之下元有三江吳松乃
其一陳述古在浙西嘗尋故道開其一以泄白水之患
蓋後世故道多湮雖松江尚存然亦淺故浙西歲有白

水太湖謂之震澤者震動也今湖翻是也在今湖州烏程之北北入常州無錫晉陵東入蘇州吳江縣周回六百五十四里按舊三江之說不一其可據者二一說謂古名漢為北江江為中江則彭蠡之水為南江至揚雖已合為一然以其三水合流謂之三江猶洞庭九水俱滙謂之九江也范蠡所謂吳之與越三江環之民無所移謂俱在大江之南爾今通州福山鎮猶名三江渡是也然三江既以彭蠡為一則上文既出彭蠡不應下文又出三江且經文二既字對舉皆本效之辭彭蠡既豬矣則陽鳥攸居三江既入矣則震澤底定是三江者乃震澤下流之三江也北方之水河為大故凡水名皆以河為總稱南方之水江為大故凡水名皆以江為總稱然則三江之江不必疑為大江之江也今按揚州之境嶺至柳虔北枝趨敷淺原水皆東流又自建嶺一枝轉而北趨介衛為歛嶺亘宣而抵建康其岡脊以西之水皆西流是俱滙為彭蠡其岡脊以東之水南則浙江北

則震澤也彭蠡之水不豬則今江西江東諸州之水為揚
吳西偏之患震澤之水不泄則今浙西諸州之水為揚
東偏之患揚雖北邊淮而於徐已書又雖中貫江而於
荆已書朝宗獨大江之南西偏莫大於彭蠡東偏莫大
於震澤二患既平則揚之土田皆治矣故特舉二湖以
見揚之告成若其南偏率是山險浙亦山溪計不勞施
功故餘篠蕩既敷厥草惟天厥木惟喬篠箭竹蕩澗節
竹也爾雅東南

之美者有會稽之竹箭焉厥土惟塗泥厥田惟下下厥賦下上錯

揚江湖之區下流之地其土塗泥而其田反居第九古
人尚黍稷田雜五種故雖水潦旱乾而各有所收塗泥
之土其田獨宜稻不利他種故第為最下厥賦第七又
有時雜出於七等之上則人功亦稍修矣自唐以來則
江淮之田號為天下最漕餉皆仰給於東南厥貢惟金三品瑶琨篠蕩齒草

羽毛惟木鳥夷卉服

三品金銀銅也。瑤石之美似玉。古有瑤爵。今瑪瑙水晶壽山石皆可。

為杯器。蓋瑤之類。現今崑山石是篠。以為矢箭。蕩以為管。儀禮蕩在建鼓之間。是也。齒象齒草犀兕之皮羽翟。

雉毛旄牛尾古為揚貢。今嶺海之間有之。凡此皆為器服。車甲旌旗繫纓之飾。惟木惟與也。木豫章之屬。鳥夷。

海鳥之夷卉服草服也。如今黃草蕉布之類。

厥篚織貝

博物續志曰。閩中多木綿。植之數千株。採

其華紡以為布。名吉貝。南史言林邑等國出吉貝。木薛氏云織貝。今木綿也。或曰織貝即鳥夷所貢。如今南海

諸番皆以木綿為服。謂之搭布。其細者則名吉貝。

厥包橘柚錫貢

小曰橘。大曰柚。惟荆揚有

之。喻淮而北則為枳。橘頌所謂受命不遷者也。沈存中謂本草柚皮甘。今所謂柚其皮極苦。而橙皮甘。古之柚

蓋橙云錫貢。錫命則貢聖人。不常以口腹之味擾民也。

沿于江海達于淮泗

徐州已言

淮泗達菏故此

荆及衡陽惟荆州

北抵荆山南跨衡山以南荆山在今襄陽

府南漳縣衡山在今衡州之北九十里屬潭州湘潭縣
荆州即今荆湖南北路北接京西西侵夔峽南控廣西

江漢朝宗于海

蔡氏曰江漢合流于荆去海尚遠然水道已安下流無壅奔趨于海猶諸侯之

朝宗于王也

九江孔殷

九江洞庭也孔殷甚得其中也朱子謂國初胡祕直近世晁詹事陳冠之

皆以九江為洞庭按山海經亦云洞庭沅澧之水瀟湘
之泉是為九江今按禹貢東至于澧過九江則是古者
澧先入江而後九江入也澧當在九江數外今考朱子
文集及漢史及江陵新志更定九江源委一曰瀟江出
道州營道縣九疑山亦名營水過零陵下與湘江合二
曰湘江出靜江府興安縣陽海山東北名緝甯東北至
潭州入洞庭三曰蒸江出衡州衡陽縣西會衡山諸源
而下合于湘以其水氣特盛故名為蒸舊說不在九江

之數朱子文集言九江云湖南有蒸湘之屬而記文亦云蒸湘之會今入于此四曰濱江出武岡軍唐亂山又名邵陵江亦名益陽江至益陽縣西北入洞庭五曰沅江出沅州西蠻界中至辰州與酉江合據西漢志則沅水出牂柯郡界故且蘭縣山東北流二千五百三十里至益陽入洞庭且蘭今屬播州是與牂柯江隔嶺而分者也六曰漸江出索縣東流與沅合七曰淑江出辰州淑浦縣鄜梁山西流與沅合八曰辰江出辰州西南蠻界中東流與酉合九曰酉江出會溪城西山中至辰州東合沅辰北流至鼎州東入洞庭此九江也但郴江亦一州之水其源出嶺至郴城下始勝舟又五十里與東江合而始大北入湘江舊皆不在九江之數但不知其與漸淑二水孰為大小今不敢更有升降已上九江會為洞庭計禹時九江入江會合未甚廣故未有洞庭之名其後會聚日廣方八百里而洞庭山遂在其中故因山得名云今所謂荆湖南北路自是而分

沱潛

既道

爾雅江出為沱漢出為潛今江陵府松滋縣南枝江縣北江分三十餘所下流復合曰沱籬江公安

縣有沱潛港此沱之證也潛出今江陵府潛江縣漢志謂華容有夏水首受江東入海說者以為潛水華容今

監利縣北

雲土夢作又

舊雲夢土作又太宗得古本尚書改焉江北為雲左氏所謂濟

江入于雲中沈存中鄭漁仲謂今監利玉沙景陵等處是江南為夢左氏所謂田于江南之夢沈鄭謂今公安石首建寧等處是然二氏之說皆在今江陵府之境但今德安府有雲夢縣而荆門之長林縣岳州之巴陵縣亦皆有雲夢司馬相如謂雲夢方八百里其所連亘固廣楚之藪澤不一後人既以雲夢兼稱故所在藪澤皆謂雲夢爾又按荊州之地中間卑濕江漢至此支分沮洳故藪澤為廣今枝分為沱潛者既道則其沮洳為雲者皆為平土為夢

厥土惟塗泥厥田惟下中厥賦上下

荆揚之土皆塗泥性止宜稻故田為第八視揚稍高爾
今世謂江陵為魚稻之鄉其餘類此然而賦入第三以
近中土人厥貢羽毛齒草惟金三品杫榦栝柏荆貢畧
功修也

羽毛齒草所謂利盡南海也金次于揚而木加焉杫古
文作杻爾雅杻一名櫂郭璞謂材中車輞榦栝也材中

弓弩之榦周官所謂荆之榦是也礪砥砮丹礪砥石可
栝檜也揚止言木荆又備言羣材

曰礪細曰砥今郢石是也砮者石可以為矢鏃今思播
有之周初肅慎氏貢楛矢石砮家語孔子嘗以對陳侯

石砮之問蘇氏謂孔子不近取諸荆梁而遠取之肅慎
則荆梁之不貢此久矣丹朱砂也今辰錦所出光明砂

及溪洞老鷄井所出尤佳惟箇籥楛三邦底貢厥名箇籥竹也趙宣
子所謂箇籥之

勁楛其本堅小而直陸璣謂葉如荆而赤莖似著三物
皆中矢筈三邦所貢又為名材三邦之名不傳考工記

曰妨胡之筇鄭氏謂胡子之國在楚之旁者唐志零陵貢葛筇蓋此類云

包匭菁茅

菁茅一茅三脊

管子謂出江淮之間召陵之師責楚貢包茅不入無以縮酒朱子謂古人醉酒不以絲帛而以編茅王室祭祀之酒則以菁茅取其至潔包者苴之匭者匣之也劉蕡謂辰州盧溪縣包茅山一茅三脊今屬麻陽縣然鄂州山上亦有之祥厥篚玄纁璣組爾雅一染謂之縑再染謂之纁三染謂之纁考符東封取諸此

工記曰三八為纁一說謂六入為玄古人玄衣纁裳璣珠生於水類玉組辯絲以貫珠以為冠纓佩以貫玉帶以為紐約是三九江納錫大龜尺有二寸以上謂之大龜龜之神在甲故可以者皆冕服所需

卜納錫浮于江沱潛漢逾于洛至于南河

荆之諸國或從江或從沱

或從潛以入於漢自漢入丹河白水河即踰山路入洛達于南河

荆河惟豫州

豫於九州為中

土南跨漢而抵荆山北距南河即今東西南三京潁
許汝亳陳曹孟鄭唐隨襄均鞏陝虢商鄧諸州之地伊

洛澗既入于河

世傳禹闢伊闕今河南伊闕縣兩山相對如門闕伊流出其間北至洛陽

縣南入洛洛出熊耳山在商州上洛縣今虢州盧氏縣

河南永寧縣皆有熊耳山邵康節謂當以上洛者為是

澗水出今河南府河南縣穀城山至偃師縣入洛澗水

出河南府澗池縣東北白石山至河南縣入洛洛至鞏

入滎波既豬

滎波孔氏以為一水周官職方其川滎雒其浸波澁則二水也沛水入河而南出溢

為滎今鄭州滎澤是其處爾雅水自洛出為波而山海
經曰婁涿之山波水出其陰北流注于穀二說未知孰

是西漢末沛水不復南溢而滎涸漢明帝

導滎澤被孟

使王景即滎故瀆東注浚儀名浚儀渠

諸滎澤在今曹州沛陰縣孟諸在今應天府虞城縣自
滎澤至孟諸凡百四十里二水舊相通今滎澤自分

南北清河近時大河亦被孟諸併行灘水矣

厥土惟壤下土墳壚

其上者無塊而柔其

下者或膏而起或剛而踈如今輟轅之滄淖泥關之沙陷皆所謂下土者

厥田惟中上厥賦

錯上中

田第四賦第二雜出第一唐虞甸服跨河而南故豫之賦與冀相埒計皆上上冀言上上錯豫

言錯上中特異文耳

厥貢漆象絺紵厥篚織纊錫貢磬錯

紵以爲布纊綿

也餘見上磬錯磬玉不可多琢以錯磨成錯鑄鐵爲之今鑪是有用則錫命而貢

浮于洛達于

河華陽黑水惟梁州

東北距華山之陽西南抵黑水即今興元成都潼川夔州四路及松

外諸戎東西珥河諸蠻漢永昌唐姚州今大理之地

岷嶓既藝

岷山江源嶓冢漢源說見下文岷山

之下沃野千里與漢中俱號天府之土江漢之源既滌則岷嶓之墟皆種藝矣

沱潛既道

沱自今永

康軍導江縣大江分流入成都及彭蜀諸州至新津縣與大江復合此皆沃野灌注之利也水自漢出為潛然地志巴郡宕渠縣有潛水西南入江今渠州流江縣也又漢中安陽縣有潛谷水出西南北入漢今洋州真符縣也然此潛自指西漢水出秦州清水縣亦名蟠冢山東南流徑西和州南名犀牛江東合于嘉陵江以入江梁州不言江漢以岷嶓

蔡蒙旅平

蔡山在今雅州嚴道縣南諸葛武侯征南

沱潛源流之治見之

夢周公於此遂立周公廟因以周公名山蒙山在今雅

州名山縣東謂之蒙頂山雲霧常蒙其頂上合下開沫

水徑其中出為溷涯水沫即大渡河也

和夷底績

雅州嚴道

旅祭也平謂蔡蒙之媪水土皆平也

以西地名和川即青衣水也夷人所居今為羈縻州有

和良和都之名禹之治梁西則導江東則導漢而青衣

大渡諸水又在岷山之南以東故禹於蒙山致平者為

大渡河諸水於蔡山和夷致功者為青衣水諸源也青

衣水與大渡河合至今嘉州南岸青衣山下入于岷江青衣蠶叢氏之神也

厥土青黎厥田

惟下上厥賦下中三錯

黎細而疎也梁土色青故生物易性疏故散而不實向聞吏牘

謂成都土疏難以築城蓋此也田第七賦第八或七或九

厥貢璆鐵銀鏤砮磬熊羆

狐狸織皮

梁州產鐵漢書蜀卓氏程氏皆以鐵冶富擬邦君銀白金鏤鋼鐵磬石磬漢於犍為水濱

得古磬十六枚蓋其土人所琢也熊羆狐狸四獸其皮可以為裘其毳可以織為金罽

西傾因桓

是來浮于潛逾于沔入于渭亂于河

西傾雍州山在今沔州臨潭縣西一

百八十里洮水出其北入河桓水出其東南今名白水江又一源名墊江出洮及其南疊州岷州宕昌諸處東南合嘉陵江以南入江嘉陵江者出大散關嘉陵谷西傾諸國雖隸雍牧而水道則於梁有桓水之可因梁州

通都水道或自潛或自沔潛沔於渭無可通之道乃逾山而後可以入渭經當言入于沔逾于渭如上文逾于洛之例今本誤也蓋潛即西漢水沔即褒水自江沂嘉陵江而上至大散關一至秦州天水則踰關可以入渭矣沔水出京兆武功褒中南至褒城縣褒城鎮入漢斜水亦出武功而北入渭漢時人上言通漕謂褒絕水至斜間百餘里以車轉從斜下渭經自沔入渭不言黑水斜者因大以見小也由渭入河絕流而渡曰亂

西河惟雍州

西南距黑水東北距西河即今永興秦鳳涇原環慶鄜坊麟府熙河等路及唐隴西

西涼吐番吐谷渾疊宕甘肅瓜沙等地

弱水既西

說見

涇屬渭汭

見下文

水出原州百泉縣南流至京兆府高陵縣入渭屬注也

漆沮既從

漆水今同州白水縣即漢志西

洛水或云出西夏界中厯保安郡同之境而入渭沮出今坊州昇平縣北子午嶺與漆水合至同州朝邑縣東

南入澧水攸同澧水出今京兆府鄠縣終南山東北流入渭荆岐既旅終南

惇物至于鳥鼠荆北條荆山在今耀州富平縣岐山在今鳳翔府岐山縣旅定其祭秩也終南

在今京兆府南自西傾秦隴東亘雍南以至秦華故謂之終南惇物在武功鳥鼠即渭源說見下文三山不言

所治皆即山以名其地自東而西原隰底績至于豬野

原隰詩所謂度其隰原者在今邠州豬野在今涼州姑臧縣名休屠澤魏太武伐涼謂姑臧城東西門外湧泉

合于城北其大如河其餘溝渠流入澤中其間乃無燥地澤草茂盛按水土如此此禹所以底績也三危

既宅三苗丕敘沙州燉煌縣東四十里有卑兩山一名化雨山有三峰甚高人以爲三危又宕

昌羌即三苗之種其地有疊州山多重疊三危山有三重或在其地戎人凡山有三峰者便指以爲三危故漢

志西指化雨樊綽又指麗水之山但禹貢即山以名地而自唐以來地屬吐蕃難於考定聖人黜惡以遠為罰經理則不以遠為間故於三危之地亦安定之而三苗之在其地者亦知順序矣

厥土惟黃壤

厥田惟上上厥賦中下

黃土之正色而又細柔故厥田為九州第一後世號關中為沃

野謂之天府蓋以此也然就其間較之亦惟涇渭澧漆之區最為沃壤西邊近沙磧北邊山狄故禹於雍州自終南至鳥鼠則自東而西自原隰至豬野三危則自內而外賦出第六生聚蓋不同也雍州之地至戰國秦漢富庶甲天下漢衰地力耗自唐漸復然不能及東南歷宋朝滋不及然雍冀之非古西以夏北以契丹也揚州厥田下下而賦下上自唐以來雖關中亦仰東南之粟至宋朝則軍國之需皆仰給於東南矣生聚之繁於此為盛古今地力風土

厥貢惟球琳琅玕

球玉可以為磬琳美玉琅玕青

其不同蓋有由矣

玉雍之西有崑崙之玉其類非一皆
球琳也其東有藍田青玉盖琅玕也
浮于積石至于龍

門西河會于渭汭

渭為雍中巨流南則澧北則涇漆沮皆入之至西河為甚徑但自岍隴以

西則皆浮于積石河而下至龍門之上其入于西河者
至華陰會于渭汭則浮渭而下者至是會于河可知也
朱子按湔水集云邢恕奏乞下熙河路造船五百隻於
黃河順流載兵下會州以取興州熙河路漕臣李復奏
黃河過會州入韋精山石峽險窄自上垂流直下高數
十尺船豈可過至西安州之東大河分六七道散流渭
之南山逆流數十里方再合逆溜水淺灘不勝舟此聲
若出必為夏人侮笑事遂寢朱子謂浮于積石至于龍
門西河則古來河道固可通舟矣而復之言如此何也
履祥按神禹導水濬川必有通道但天地人事每亦相
因自三代之衰中外聲教阻隔河源莫考至秦兼并而
河源亦在長城之外漢武帝極力開拓僅得河南空無

匈奴開朔方始得渠搜之地受休屠之降始得豬野之澤然自積石以下源委未盡得也則故道堙廢其來久矣如蜀南大渡河自吐蕃界經雅州諸部落至黎州為南邊要害之地建隆三年平蜀以地圖來上太祖皇帝見大渡之南城寨勞遠以玉斧畫河為界曰此外吾不有也此後河流忽中陷五六十丈澎湃如瀑船筏不通名為噎口蠻人不復可以窺伺殆天設險以限中外也又如自荆入蜀素號水險近四十年四川請於荆湖和糴運米入蜀舟人貫習三峽遂為安流以此推之李復所奏河道一則固恐出於吏民之託辭一則故道久廢岸谷變遷亦恐非

織皮崑崙析支渠搜西戎即敘

蘇氏謂此

錯簡當在厥貢球琳琅玕之下然雍州西界黑水此諸國又在黑水之外故附於後以織皮冠之者此皆皮服之國貢織皮者也崑崙國名崑崙山旁小國也崑崙無定所而莊騷雜書皆云西王母所居為是則在今肅州

酒泉郡南山石室玉堂珠璣鏤飾尚在事具晉書張駿傳太守馬岌所言是必古崑崙國也今西北別有崑崙都國去中國甚遠析支國名有析支河唐與吐蕃舊界也當在唐北庭金滿縣西漢書西域傳言輪臺以東捷枝渠犁捷枝即析支渠犁即渠搜與然漢武帝開朔方又自有渠搜縣為漢北極界今屬夏州西戎班孟堅謂

即西

導岍及岐至于荆山逾于河壺口雷首至于太嶽

底柱析城至于王屋太行恒山至于碣石入于海

此以下

山也岍岐荆雍山也岍在今隴州吳山縣一名吳嶽山虞周之世疑以此為西嶽故又有嶽山之名沂水出其西而南入渭芮水出其北而東入涇岐荆說見雍州壺口而下九山冀山也禹於帝都所親治導故冀山為多壺口太嶽碣石說見冀州雷首在今河中府河東縣雷水出焉山臨大河北去蒲坂三十里底柱在今陝州陝

縣三門鎮大河中流有石如柱世言禹鑿底柱為之三門至今為河流之險唐時又嘗鑿之不能殺其勢也然三門又分天門地門人門惟地門不可過耳析城在今澤州陽城縣山峰四面如城王屋在今孟州西北王屋縣泝水出焉太行在今懷州之北連亘數州為河北脊以接恒嶽程子謂太行山千里片石衆山皆石上起峰爾恒山北嶽在今定州之北碣石一在平州之南一在高麗界中至于碣石入于海一說謂恒碣之間諸水皆入于海亦通○禹貢一篇經緯脈絡舉天下山川分載九州北南以緯之又合為導山導水西東以經之然後源委脈絡可指諸掌不爾則散而無統矣導岍而下鄭王諸儒分為三條四列條之說導岍而下北條西傾而下中條嶓冢以下南條也列之說導岍而下正陰列西傾而下次陰列嶓冢而下次陽列岷山而下正陽列列之說比條為密然皆不離地脈之說就地脈之說論之則西傾嶓冢岷山三列猶可通導岍而下一列為不可

通蓋雍之西其山隴自南而北冀之諸山皆又自北而南今北條陰列所紀乃自西而東此其說之不可通者也言地理者謂太行西南跨大河與商虢秦楚諸山相接諸山總在山形之內則北條逾河之說固有此理然此亦天地全體之常形爾大抵禹貢所書多是即山以名其地故導山之說所以治水土也然隨山刊木禹功之始而經敘導山又在導水之前而其導山又必自西而下則聖人之規模次第槩可知矣蓋其治水之初利在奠民擊鮮續食固是一時之急者然必自西而下者天下山川相為綱紀必且自西徂東窮源極委廣覽天下之形勢周知川源之險阻而後分畫賦功次第而舉故導山乃所以為導水計也自其大者言之導岍而下為河漆沮涕洛陸也西傾而下為渭涇澧也為洛為淮泗也蟠冢而下為漢沔潛三澁也自岷山而下為江沱九江彭蠡也自其細而言之則固多矣如導沂則岍沔可知及岐則杜漆可知至荆則合洛池瀕可知析城則

汾絳可知太行則懷沁淇池國蕩諸水可知恒山則恒
衛潞滋易桑乾可知至碣石則大小遼水可知導西傾
則西黑北洮南桓可知朱圉鳥鼠至于秦華則西漢嘉
陵褒斜灞澹可知熊耳外方則丹白波穀伊潁可知桐
柏至于陪尾則汝渦濠泗沂可知導嶠冢至于荆山則
漳沮潛夏可知岷山之陽則青衣大渡馬湖涪黔江可
知至于衡山則九江諸源至于敷淺原則水之西入洞
庭東會彭蠡者又皆不言可知矣凡此諸說禹蓋兼舉
並行不可以一說斷也

西傾朱圉鳥鼠至于太華熊耳外方桐柏

至于陪尾

西傾至太華雍山也西傾說見梁州一名強臺山謂之西傾則其西地勢反下而水皆西

流入黑水矣自此而東則洮出其北白水江出其南朱
圉山在今秦州伏羗縣一名白巖山太華今華山熊耳
外方桐柏豫山也熊耳見下文外方舊說嵩山非也嵩
高世名中嶽安得反謂外方又與江夏內方相為內外

哉按今河南府伊陽縣伊闕鎮之西陸渾山據唐志一名方山蓋古為外方春秋時秦晉遷陸渾之戎居此因名陸渾云其山固嵩高之聯峰然謂為嵩高則非爾桐柏見下文陪尾徐山也泗出陪尾在今襲慶府泗水縣桃虛西北舊說拘於地脉以陪尾即漢志橫尾山在安州安陸縣今屬信陽軍

山內方至于大別

嶠冢說見梁州其形如冢荆山說見荆州漳水所出舊南入江近世導之

東流入諸湖樂合潛江以通漢內方山漢志竟陵縣章山古文以為內方今荆門軍長林縣也大別山在今漢陽軍漢陽縣其形如鼈西有小別

岷山之陽至于衡山

過九江至于敷淺原

岷山梁州說見下文山南曰陽蓋岷山一帶南出謂大渡之源又包

青衣以東馬湖江黔江諸源東出一枝為衡山其南行而東者為嶺包瀟湘之原而又一枝北向以至敷淺原

故禹自衡山過洞庭而至敷淺原也敷古文作傳通典
註江州潯陽縣有蒲塘驛前有敷淺原原西有傳陽山
朱子親至其處謂廬山當其地而敷陽山乃在廬阜之
西南則是敷淺原之陽也蓋廬山雖高而其中原田連
亘人民奠居所以有敷淺原之名後世匡續結廬居之
遂名廬阜而其支隴林麓猶存舊名爾導山而云過九
江則導山即所導弱水至于合黎餘波入于流沙此以
以導水可知也導弱水至于合黎餘波入于流沙此以
水蓋總敘水之原委泝源而及流即大以統細也弱水
出吐谷渾界窮石山至甘州張掖縣合黎山下唐志言
自合黎峽口西出即居延澤經云至于合黎餘波入于
流沙則居延乃古合黎澤爾水溢則被流沙也雜書言
西域使者乘毛車以渡弱淵豈非指此為弱淵與蓋弱
水散漫無力不能負芥投之則委靡墊溺及底而後止
惟皮船可渡其間一渡名娑夷水廣畫一矢用藤為橋
極費工力以水沙不可施柱故用藤橋也流沙通典謂

在沙州西八十里其沙隨風流行大抵西北之地多是沙磧史書所謂河沙諸國佛書所謂沙界恒河沙是也沙則水滲而下如沙州以西山北之地即連流沙弱水滲其下山南之地即連蒲昌海西域二河潛其中王元章云山東孫氏子自少為兵嘗乘皮船以渡久之又船行至南詔蓋軍人不知典籍此非但渡弱水而西又循黑水而南矣又嘗問西域賈人識流沙

否曰識之非惟沙流石亦隨之流也 導黑水至于三

危入于南海

漢志黑水出張掖雞山南至燉煌過三危山張掖今甘州燉煌今沙州也按黑水出

雍之西而南入于南海為雍梁二州之西界蓋出崑崙之南谷也自積石西傾岷山青衣岡脊以西諸水天竺以東諸水皆入之故黑水諸源亦非一唐樊綽云西夷之水南流而入于南海者凡四曰區江曰西珥河曰麗水曰彌諾江其曰麗水者古黑水也三危山峙其上程泰之以為麗水遠小其所謂西珥河却與漢志葉榆澤

相貫廣處可二十里又漢滇池即葉榆之地漢武初開滇池其地有黑水祠乃蜀之正西北距宕昌不遠宕昌即三苗之種又與敘于三危者合履祥按二氏所考諸源非一其實則合而為瀘水沈存中謂夷人謂黑為盧則瀘水即黑水也蠻中固有西洱河亦有東洱河東西二洱皆因諸蠻而得名安知其不指正流為西洱也唐以漢永昌故地置姚州有西瀘蓋唐既以馬湖江為瀘故遂以姚州之瀘為西瀘而雲南之地又有瀘南縣諸葛孔明征南中五月渡瀘即此水也但兩漢志以瀘為溫字從省誤後人失考爾故東漢志謂黑水祠謂溫水者即此瀘水也今按西南夷圖西洱河北合龍德河中合印鴻川南合導江川其印鴻川東過葉榆之水又東合流名西洱河過滇池則黑水祠在焉東南與麗水合而區江亦合于麗水者此皆黑水諸源也故黑水經過雲南但名瀘水至交趾又名歸化江廣如江漢合流處東南入海而海道圖自名黑水口在大理國東南大理

即雲南也唐名南南導河積石至于龍門南至于華陰東
詔至宋名大理云

至于底柱又東至于孟津東過洛汭至于大伾北過泒

水至于大陸又北播為九河同為逆河入于海

爾雅河出崑崙

而說崑崙者多誕妄今不盡辯而說其總論積石在今
積石軍其下蘭州華蘭山石門黃河所出西南涵浸轉
而東北流洮水北流入之又北而湟水會星海諸水入
之其祁連山青海之水出浩疊東流合于湟水皆入焉
皆崑崙北谷諸水也又北入北狄界中漸轉而東至唐
受降城折而南流為冀西河大抵盤東山碇之間千數
百里禹載壺口治梁岐皆為冀河已見冀州故此不書
又南至河中府龍門縣之西山開岸濶自高而下奔放
傾瀉聲如萬雷是為龍門南至華州華山之陰渭水入
焉水勢撞擊地名潼關折而東流為冀南河至陝州陝

縣底柱壅河中流世傳禹鑿三門以通之又名三門山
 又東至今孟州孟津河流始緩南北通津謂之孟津東
 過今河南府鞏縣洛水入焉名為洛汭又東至澶州黎
 陽縣大伾山即今黎陽山也折而北流為冀東河至今
 冀之信都泲水入焉今名枯泲河是也又北至大陸說
 見冀州又北播為九河說見兗州逆河之得名以潮至
 而水逆流也漢志作迎河謂迎接九河也亦通古河入
 海之地蓋在右碣石自周定王五年河始徙蓋自禹以
 前河決而北故禹播九驪潔以東殺之至漢河決而東
 故并行於潔而泲亦為河所并至宋則河決而南矣蓋
 古河北流既久濁流舊淤土膏日息則地形反高故河
 不復北趨漸次東決至五代晉漢時河遠梁山以東北
 入海至紹熙甲寅南連大野并行泗水以入于淮於是
 有南北清河之分北清河即泲水故道南清河并泗水
 入淮今淮安之西二十里對岸清河口是也今梁潘家
 山又塞而黃河遂西浸睢陽之境此古今之變也

潘家

導漾東流為漢又東為滄浪之水過三澨至于大別南

入于江東滙澤為彭蠡東為北江入于海

潘冢說見梁州漢水初出

舊名為漾至漢中為漢又一源名沔水故世以漢沔通稱然據書意則沔蓋褒水也又東為滄浪之水今均州武當之北四十里名滄浪洲三澨即沔河其一源名三家河其一源名三里河西河流至鄧州東南合白河清水河入漢是名三澨也又東南至今漢陽軍大別山而南入江是名沔口自潘冢至此凡二千四百二十里東滙澤為彭蠡朱子以為多句東為北江入于海鄭漁仲以為羨文意禹治水之時與今不同方江漢未奠今江西諸水壅遏不通滙而為湖雖非江漢所滙而勢實滙之史官追記固易差失而古書多是隱見互見若先叙江而滙澤在江條之內似無甚失惟先敘漢以及彭蠡而後叙江如此互見則首尾橫決反為失之中江北江

想當時方言如此以識江漢合流之別彭蠡淺源而岷與江漢並列為北中南此恐亦當時東西之方言爾岷

山導江東別為沱又東至于澧過九江至于東陵東迤

北會于滙東為中江入于海

江出岷山岷山數百峰大酉山為最大雪山三峯闕

其後冬夏如爛銀山一谷名鐵豹嶺者有西嶽廟廟下名羊膊石江水正源也其西南分一源又為大渡河矣江至永康軍導江縣諸源既盛遂分為沱東至眉州彭山縣復合于江江南受青衣大渡馬湖江北受嘉陵江又南受黔江出三峽而後東至于澧不書諸水以梁州蔡蒙和夷潛沔皆互見而三峽天險非入都通道計不施工故不書東至于澧過九江則禹時澧自入江而九江始入今則澧與九江俱滙為洞庭而併入江矣故說者遂以澧亦在九江之數非也詳見荊州至于東陵今岳州巴陵也東迤北會于滙當作會于漢蓋江勢迤北

處正受漢口若至彭蠡則東流久矣滙字必因上文而誤也禹於導江之功在荆為多蓋荆地卑濕沮洳江漢朝宗則揚自彭蠡導沆水東流為濟入于河溢為滎東而下不復致力矣

出于陶丘北又東至于荷又東北會于汶又北東入于

海

沛出王屋在今孟州王屋縣西北始發源山頂崖下曰沆水既見而伏東出於沛源縣湧為二源東源周

迴七百步其深不測西源周迴六百八十五步其深一丈合流至溫縣是為沛水至懷州武德縣入河伏而南出溢為滎澤東出于陶丘北則今曹州濟陰縣又東至于荷說見豫州又東北會于汶在今東平府中都縣又北東入于海今青州北海也沛水性沈勁太行為河北脊其西水皆西流其東水皆東流沛出王屋本太行脊西之山而伏流以東南出及既入河又伏橫而南出至王莽末沛入河不復南出而河南無沛瀆滎自受河為

浚儀渠然沛則未嘗不伏流地中今阿井煮膠為性鎮墜能清濁水吳興陳氏謂今歷下凡發地皆水蓋皆沛水過其導淮自桐柏東會于泗沂東入于海地理並見前章淮出

桐柏初甚湧復潛流三十里然後東馳亦尚淺其深處為十四潭至并汝潁始大東會泗沂說見徐州今水之入淮者不獨沂泗汝潁渦禹時不費治導故不書豫之沮隋唐之汴今之黃河皆入淮矣自桐柏至海凡千七百里導渭自鳥鼠同穴東會于澧又東會于涇又東過漆

沮入于河

鳥鼠山見雍州爾雅其鳥為鼯其鼠為鼯穴地三四尺鼠在內鳥在外孔氏書傳共為雌

雄張氏地理記不為牝牡又其山一名青導洛自熊耳

雀山渭自鳥鼠至入河一千八百七十里

導洛自熊耳

東北會于澗瀍又東會于伊又東北入于河

說見豫州北方諸水

雖大河亦水惟洛水不冰所以謂之溫洛一是天地之中二是其北連山以障北風三則前人謂其中有礬石東漢都洛陽以漢運火德故去九州攸同四隩既宅九水加佳為雒後世仍從水各

山刊旅九川滌源九澤既陂四海會同

此總結平治之功也九州攸同

者言九州之內經理無間也四隩既宅者言九州之外四海之隈亦已安居也刊者去翦鬱驅猛獸興種藝也旅者定祭秩立表鎮也九川凡九州之川不曰通流而曰滌源者此所謂濬畎澮距川則田里無水潦壅塞之患也陂者九州之澤有陂障無潰決也四海會同凡水皆會同于海各得所歸無復橫流也

六府孔

脩庶土交正底慎財賦咸則三壤成賦中邦

此總叙貢賦之典也

府官府也六府水火金木土穀之府也水土既平故六者之利無不興而六者之官無不舉也庶土交正底慎

財賦此土賦也成則三壤成賦中邦此田賦也庶土謂凡山澤丘陵墳衍原隰之土交皆也謂皆物其土地之所宜以任土事也底定慎謹也謂定庶土之所出謹財賦之所入則任民所宜貢土所有不强其無不盡其有也則等其土田為上中下而各定其什一之賦也中邦中國也古者田之可井者則整齊經理謂之中國其田不可井者則隘塞之地疆以戎索故有九州內之夷狄蔡氏曰土賦或及於四夷田賦則止於中國也

錫

土姓祇台德先不距朕行

水土既平田制既定於是修封建之法各使守之錫土者

賞其功勞定其限制也錫姓者表其勲德輯其分族也封建之來固久經洪水之患則限制多不明有水土之功則庸勞所宜賞此所以修封建之制也當時堯舜在上封建雖非禹所專而實出禹所畫所謂弼成五服者此章以下是也台朕指禹也如春秋我魯也禹既任天下之事則率屬倡牧儀刑百辟者固其職此所以祇敬

我德以為率先而其所行諸侯自無所違距也周公謂作周乎先是也

五百里甸服百里

賦納總二百里納銍三百里納秸服四百里粟五百里

米

此節以下大約言遠近征役朝貢疆理之宜也服事也皆所以供王事也五百里甸服自都城以外四面

各廣五百里商周所謂王畿千里者也甸田也千里之內天子所自治是為天子之田而畿內百姓所供事也賦納總者其賦則禾連稊束之以納也禾以為糧稊以茨屋以飼國馬以為薪芻凡雜用也銍者刈其穗也若今刈粟刈黍者惟刈取其穗也其工省於總矣秸稊也服役事也謂輸將之事也有穀曰粟無穀曰米總納繁重故惟百里之內納之若二百里則去總而納銍四百里遠則簡銍而納粟五百里又遠則去穀而納米近者重而遠者輕重者粗而輕者精賦皆什一力則以遠近為輕重爾古人九數有粟米均輸二法蓋本於此然獨

三百里之民納橐而不粟視他處為甚輕而有服役之事焉服役獨在三百里者蓋酌五百里之中為轉輸粟米之賦也史記謂古之善賈者百里不販樵千里不販糶以其遠而重也然則聖人賦民必不使之四百里而負粟五百里而負米矣故制為田賦自百里而止於二百里焉乃若四百里粟五百里米不言賦納蓋不遠納於帝都亦行百里或二百里而使三百里之民轉而輸之於都爾夫二百里之民受遠郊之米粟而為轉輸力若勞而賦則省又以見古者賦役不兩重

五百里侯服

百里采二百里男邦三百里諸侯

甸服之外四面各五百里為諸侯之服侯

維也所以維衛天子也一曰侯后也為民羣后也采朝廷公卿大夫元士食采之邑也甸服千里固不以封而凡公卿大夫之食邑亦取於侯服則千里之畿天子專之後世不然故天子之地浸弱男邦小國也諸侯大國

也內小國則弱有所依外大國則內無所逼而外足以禦蔡氏曰甸服分為五等侯服分為三等外諸侯分各

二
等
五百里綏服三百里揆文教二百里奮武衛

侯服之外四面

各五百里為綏服綏安也內則侯甸外則要荒而綏服當其中故取綏安之義內三百里揆文教所以接華夏之教以撫要荒外二百里奮武衛所以禦要荒之蠻以安華夏優文儉武又有深意然內三百里揆文教則自此以外凡有國者文教可知外二百里奮武衛則自此以外凡有國者武備可知

五百里要服

三百里夷二百里蔡

綏服之外四面各五百里為要服要如裳之有要也所以綱統四裔

也舊說要約也其地遠於畿甸近於邊塞雖州牧侯伯為之綱領控制而其文法則畧於中國矣又於其中分三百里為夷二百里為蔡夷者易也取簡易之意五百蔡者放也如蔡蔡叔之蔡有罪者則蔡放於此焉

里荒服三百里蠻二百里流

要服之外四面各五百里為荒服此為四遠荒畧之

地田野不井人民不多故謂之荒所以經畧之者又簡於要服矣其中三百里謂之蠻因其俗也二百里謂之流則有罪者流徙於此如流共工于幽州是也蔡流皆放逐罪人之地罪有輕重故地有遠近云○右五服二面各二千五百里四面相距方五千里雖幅員二萬里而夷蠻又在其中聖人不務廣地如此然此亦大約限制以為朝貢之節詳畧之宜耳每服之中又自分為二三節此周制九服之所由起也

東漸于海

西被于流沙朔南暨聲教訖于四海

漸如漸民以仁之漸被如被四表之

被此統言聲教之達也聲如樹之風聲之聲教則上行下效之謂禹迹所至不惟治水土而已其聲律身度觀民設教本末備舉東漸于海則教化漸淪于海西被于流沙則教化冒覆于流沙至於北雖止於恒碣南雖止

於衡陽而南北地長聲教旁達不可為限故南北不言
所至總而言之其教化則盡於四海矣聖人為後世計
雖立為五服之限而教化所及感慕無禹錫玄圭告厥
外故外薄四海咸建五長以經理之焉

成功

此告成也錫如師錫之錫玄水色也禹既平水土
故以玄圭為贄入覲而告成于帝焉一說禹治水

獲玄玉之瑞故謂之錫禹不自居以歸之帝而告成功焉

履祥按禹貢一篇蓋夏史之追書也夫既夏史之追
書則紀成功之書爾夫既紀成功之書則禹之治水
其先後次第規模不盡見於此而於此可以推見爾
何者禹貢於九州獨冀州載修治之辭於上餘州則
皆曰某山既藝既旅某水既道既從某澤既豬底定
是皆記其成功耳其先後次第不盡見於此矣而謂
於此可以推見何也曰禹貢一篇分敘九州以經之
總敘山川以緯之每州之下奠山川緒藪澤而後繼

之以物土宜定田制又繼之以經賦法通朝貢其總
敘於後則列山川敘源委總成功定封建別限制同
教化是禹八年之間其先後次第經理規模廣大周
密本末備具蓋可想也而其先後次第則證諸禹所
自言者而尤可見禹曰洪水滔天懷山襄陵予乘四
載隨山刊木暨益奏庶鮮食此禹功之始也孟子所
謂龍蛇禽獸之害烈山澤而焚之者也此禹貢分敘
所以先於刊定諸山總敘所以先於導山是也禹曰
予決九川距四海濬畎澮距川暨稷播奏庶艱食鮮
食此禹功之中也孔子所謂盡力乎溝洫者也此禹
貢分敘所以定川澤辯厥土等田制總敘所以有導
川則壤成賦甸服等事也蓋禹之治水不但疏決河
患鑿阻濬川而已凡天下平土皆制其井畝疏為溝
澮以達于川所謂畎澮者即田間之畎一同之澮也
所謂溝洫者即一井之溝一成之洫也則是井田之
制自禹定之此禹中間功庸最為周密至於所謂懋

遷有無萬邦作又所謂獨成五服至于五千外薄四海咸建五長則禹功之終也分敘之浮于某水達於某水總序之六府孔修庶土交正迄于四海皆是也或曰書曰洪水滔天既曰滔天矣則禹之治水若何用功耶曰滔天云者當時方言形容其勢耳愚昔聞之家庭曰洪水滔天即如後世淫雨大水河決之灾但堯末年連歲有此然彭蠡諸水而指為漢滙此則尤有可疑者予已釋而辯之矣抑盖有天地自然之變者如河徙而南沛涸而淤而冀兗青豫徐之支流水澤皆易其源委甚至九河淪而為小海碣石陷而在海中此尤其變之大者也大抵天地之間山陵水石自有消長顧其消長之數甚長而人之年壽有限則不及見其消長遂以為古今有定形爾山與土石且有消長而况水乎昔沈存中奉使河北邊太行而北山崖之間往往銜螺蚌之殼及石子橫巨石壁如帶謂必昔之海濱今東距海已千里以愚觀之此即

昔之河濱也所謂自東河至東海千里而遙者也夫以昔之河濱而今在山崖石壁之間即河日遷山日長石日凝蓋可知也此皆天地之間今人尚可考見之理其類非一人鮮不謂迂者朝菌不知晦朔夏蟲不可語冰其斯之謂矣然則禹貢地理古今之不同又安知其非天地之變遷消長若河碣之比耶或曰條列之說如之何曰予嘗疏於前矣王鄭分每章為條每段為列可爾若指為山勢之脈絡恐未然也夫天地常形固相為句連貫通然其條理亦各有脈絡若以脈絡之可見者言之崑崙四垂而為海天下諸山皆起於崑崙而崑崙無定名地之最高山之所聚江河諸源之所出即崑崙爾崑崙之山綿亘糾繆句連盤錯其南為岷山而岷山最大其東北為積石諸峯其東為西傾朱圍鳥鼠諸峯其西北諸山尤為綿亘紛錯河之所以北弱水之所以西黑水之所以南皆是也惟江河渭漢行乎中國自崑崙而東北言

之則自積石而北為湟水星海青海以至浩亶皆河源也入匈奴以東為陰山又東南自代北雲朔分而南趨為北嶽以至太行是為河北之脊壺口雷首秦嶽析城王屋皆其羣峰河之折而南汾晉諸水之所以西入河涿易寇漳恒衛之所以東入海也分而東趨者行幽燕之北為五關之險以至營平而為碣石此北絡也自崑崙以東言之則東為西傾而洮水出其北入河桓水出其南入江又東為朱圉鳥鼠諸隴則為渭之源自渭源以北即夾河源而北以東若岍岐若荆山諸峯涇水漆沮諸源也自渭以南即西傾而下諸峯亘為終南屹為秦華東北為穀陝東南為熊耳外方嵩高伊洛之源又南為桐柏淮源以達于淮西諸山此中絡也又自西傾朱圉而南分是為蟠冢漢源夾漢而趨者北則終南華熊諸隴南則蜀東諸峯說者謂蜀東諸山皆蟠冢正謂其岡岫綿亘爾又東則為荆山內方此中絡之次也自崑崙之東南

言之是為岷山江源夾江而東者北支即西傾以南
蟠冢以西之脉為桓水西漢水嘉陵江諸源其南支
即南趨為蒙蔡諸山青衣大渡馬湖江諸源又東包
涪黔一盤而北為三峽其東出者包絡九江之源中
盤中為衡山其再盤而北為廬阜其嶺之東出者又
為袁吉章貢盱信諸江之源至分水魚梁嶺三盤而
北趨過新安峙天目盡昇潤凡再盤之間其水聚為
洞庭三盤之間其水聚為彭蠡三盤以東則南為閩
浙北為震澤此南絡也惟泰山則特起東方橫亘左
右以障中原此所以為異與大抵水者山之液故山
盤而水之源出焉此所以聚為川流之盛地道以句
連為固故山東而水之流壅焉此所以資於疏闢之
功凡此其大約云爾或曰古今天下廣狹一也禹貢
五服四距五千里而周制九服自王畿以外每方自
為五千里何也或謂尺有長短則周尺不應半禹之
尺或謂禹五服之外外薄四海不在其數周則盡外

薄所至而經畫之此說為近然亦不應外薄之地與五服之地相半也攷之經文甸服方千里而曰五百里則凡所謂五百里者舉一面計之也若周官則曰規方千里曰王畿又其外方五百里曰某服則舉兩面通計之也是則禹貢所謂五百里甸服者乃千里而周官所謂外方五百里者乃二百五十里也至漢地志又言東西九千餘里南北一萬三千餘里則漢東西視禹貢幾一倍南北視禹貢幾二倍然攷其所載山川又不盡出禹迹之外何也古者聖人制數周密其制方田之數以御田疇廣狹制甸股之數以御遠近高深方田之制行則自井畝徑遂之直積而為道路川澮截然直方無有迂曲故中邦之地雖廣而里數則徑自秦漢開阡陌於是道里始迂遠矣此古今里數多少之不同一也周髀之經曰數之法始出於圓方圓出於方方出於矩矩出於九九故折矩以為句句廣三股脩四徑隅五禹之所以治天下者此

矩之所由生也是則句股算法自禹制之蓋積矩以
為方田而句股以測高下淺深遠近此禹之所以疆
理天下而弼成五服者也句股之數密則於山川迂
回之處與道理曲折之間以句股之多計弦之直而
得遠近之實大率句三股四弦直五以正五斜七取
之自秦漢以來誇多務廣固盡外薄之遠其計道理
又但以人迹為數不復論句股弦直故漢之九千里
大約準古六千五百里漢三千里準古一千九百七
十一里而尺步長短之異制又不在此數此古今里
數多少之不同二也至於禹貢外薄之地在五服之
外而後世斥候所到盡在里數之內此其多少之不
同又不在言者或者又曰冀在九州為北堯都冀州
則自甸服之外北短南長五服之地北無所展而南
有所棄則如之何曰隆古都冀政教四達則冀北之
野生聚教訓必不如後世之為窮漠所以冀賦為九
州第一而水平之後分為幽并其廣可知燕堯都平

陽雖曰在冀自平陽以南渡河至陝於今地理三百七十五里正五斜七於古蓋二百六十餘里耳則是甸服之地自跨冀豫冀山而豫平緬想當時甸服之地當亦如周室王畿之制蓋成周之制雖云規方千里以為王畿然西自邠岐豐鎬為方八百里東則洛陽四達方六百里總為千里爾五服之制其間絕長補短計亦如此何則周都豐鎬西至犬戎約餘千里而犬戎之地自為荒服先王之制賓服者享荒服者王自穆王以犬戎地近責其從賓服之享自是荒服者不至則是五服之制計古亦有因地而為長短者蓋諸侯之分特以為朝貢之限制亦有在近而視遠雖遠而視近者大率地有廣狹俗有夷夏未必四面截然如此正方聖人立為限制之經於中固必有通變之義讀書者不可拘於一說而不知聖人體用之

也大也

甲子八十有一載肇十有二州

以時考之并用大紀甲子紀例

肇十有二州封十有二山濬川

禹貢九州奠高山大川此分為十二州故又分

表其山及通朝貢水道吳氏曰此節在禹治水之後其

次敘不當在四罪之前蓋史官泛記舜所行之大事初

不計前後之序是也九州之來舊矣而冀為其北自陶

唐都冀其聲名文教自冀四達冀之北土所及固廣矣

及水土既平人民加聚於是分冀州自衡水以北為并

州醫無閭之地為幽州碣石以東接青州之北為營州

是為十有二州焉考詩書傳記所紀其後復為九州蓋

九州為正而幽并營不過分統青冀之故地是以殷之

制合并為幽合青為營分梁以入于雍荆周之制合梁

為雍合徐為青而并與幽冀復三馬畧見爾雅詳見職

方氏所記職方幽州其山鎮曰醫無閭其川河涕并州

其山鎮曰恒山其川滹沱嘔夷然則營州其山碣石其

其山鎮曰恒山其川滹沱嘔夷然則營州其山碣石其

川遼水與

○吳越春秋曰堯號禹曰伯禹

蓋封之為侯伯也

官曰司

空

總掌天下水土

賜姓姒氏領統州伯以巡十二部

吳越春秋敘禹治水

成功而後巡十二部則分十二州在此時可知

封伯禹於有夏封四嶽於有呂

國語太子晉曰伯禹念前之非度釐改制量象物天地比類百則儀之于民而度之于羣生共之從孫四嶽佐之高高下下疏川道滯鍾水豐物封崇九山決汨九川陂障九澤豐殖九藪汨越九原宅居九隩合通四海莫

非嘉績克厭帝心賜姓曰姒氏曰有夏謂其能以嘉祉
殷富生物也胙四岳國命為侯伯賜姓曰姜氏曰有呂
謂其能為禹股肱心膂以養物豐民人也

加賜伯益

史記秦紀曰帝顓頊之苗裔孫曰女脩生子大業大業
取少典之子曰女華生大費與禹平水土已成禹曰非
予能成亦大費為輔帝曰咨爾費贊禹功其賜爾阜游
爾後嗣將大出乃妻之姚姓之王女佐舜調馴鳥獸鳥

獸多馴服是為柏翳

即伯益也
柏亦作伯

舜賜姓嬴氏

不言封國
舊必已有

封國此命為侯伯
賜姓以榮之爾

索隱曰此秦趙之祖一名柏翳尚書

謂之益世本漢書謂之伯益是也尋檢史記上下諸文
柏翳與伯益是一人不疑而陳杞世家即敘伯翳與伯
益為二未知太史公疑而未決耶而亦謬誤也

履祥按伯益即柏翳也秦聲以入為去故謂益為翳也
字有四聲古多轉用如益之為翳契去聲之為禹入聲
準之為咎音告君牙之為君雅是也此古聲之通用也
有同音而異文者如陶之為繇垂之為倮絲之為鮪虺
之為儻紂之為受罔之為羿是也此古字之通用也太
史公見書孟子之言益也則五帝本紀言益見秦記之

為翳也則秦本紀從翳蓋疑而未決也疑而未決故於陳杞世家之末又言垂益夔龍不知所封則遂謬矣胡不合二書而思之乎夫秦記不燒太史所據以紀秦者也秦紀所謂佐禹治水豈非書所謂隨山刊木暨益奏庶鮮食者乎所謂馴服鳥獸豈非書所謂益作朕虞若予上下鳥獸者乎其事同其聲同而獨以二書字異乃析一人而二之可謂誤矣唐虞功臣獨四岳不名耳而姜姓則見於書傳甚明也其餘未有無名者夫豈別有柏翳其功如此而反不見於書又豈有馴服鳥獸者孰加於伯益雖朱虎熊羆亦以類見果又伯翳才績如此而書反不及乎夫以柏翳不得為伯益則禹不得為契咎繇不得為皋陶倕不得為垂鯀不得為鯀他如仲伋不得為仲虺紂不得為受罪不得為罔君雅不得為君牙乎史記本紀世家及總敘之謬如此者多不惟敘益為然也重黎二人而合為一則楚有二祖也四岳為齊世家之祖而

總叙齊又伯夷之後則齊又二祖也此其前後必出於談遷二手矣故其乖刺如此而羅氏路史因之真以益翳為二人又以柏翳為皐陶之子則嬴鄆李三姓無辯矣且楚人滅六之時秦方盛於西徐延於東趙基於晉使柏翳果皐陶之子臧文仲安得云皐陶不祀乎又以益為高陽氏之才子墮豷至夏啟時則二百有餘歲矣夫堯老而舜攝舜耄期而薦禹豈有禹且老而薦二百歲之益以為身後之計乎其非事實不可以不辯

封契於商

商頌長發之詩曰濬哲維商長發其祥洪水芒芒禹敷

下土方

集傳曰絕句楚辭天問禹降省下土方蓋用此語

外大國是疆幅員既

長有娥方將帝立子生商

集傳曰方四方也外大國遠諸侯也有娥契之母家也將

大也言商世世有濬哲之君其受命之祥發見也久矣方禹治水以外大國為中國之境幅員廣大之時有娥氏始大故帝立其女之子而造商室也蓋契於時始為舜司徒掌布五教于四方而商之受命實基於此履祥謂帝立子生商子女也生猶甥也謂帝立有娥氏女所生者為商蓋其時帝舜封契於商也 ○史記

本紀曰簡狄有娥氏女為帝嚳次妃三人行浴見玄鳥

墮其卵簡狄吞之因孕生契契長而佐禹治水有功帝

舜乃命契為司徒封於商賜姓子氏。○索隱曰契生堯

代舜始舉之必非嚳子以其父微故不著名其母有娥

氏女與宗婦三人浴于川則非帝嚳次妃明也。○老泉
蘓氏曰史記載簡狄行浴見燕墮卵取而吞之因生契
為商始祖神奇妖濫不亦甚乎使聖人而有異於衆庶
也天地必將儲陰陽之和積元氣之英以生又焉用此
微禽之卵哉燕墮卵於前取而吞之簡狄其喪心乎史
遷之意必以詩有天命馭鳥降而生商而言之此遷求
詩之過也毛公之傳詩也以馭降為祀郊禘之候及鄭
之箋而後有吞踐之事遷之說出於疑詩而鄭之說又

出於從遷矣甚矣遷之以不祥誣聖人也

履祥按史記自謂以頌次契之事然不得頌之意玄鳥之頌曰天命玄鳥降而生商蓋古人以玄鳥至之日祠于高禩以祈子也簡狄以是日祈焉而孕故詩述其感生之祥史以行浴墮卵之事附之幾於罔矣長發之頌禘禘之詩也推其祖之所自出者不過叙禹敷土之時有娥外氏之盛而契始受封有國是開有商一代之基亦未見其為嚳子也豈以太史克有高辛氏才子之言傳者有殷人禘嚳之說遂繫之嚳與然以頌次之則史傳之言為不可信矣其後十四世而湯有天下祖契始封之君追王玄王云

封棄於邠

稷之受封詩書不載所始但禹之治水暨益暨稷而後賢每以禹稷並稱

當是之時禹以成功受封契亦以禹功之成始封益又以佐禹之功加命則稷之封在此時無

疑也今附于禹功
之後甲子之紀焉

生民之詩曰厥初生民時維姜嫄生民如何克禋克祀

以弗無子履帝武敏歆攸介攸止載震載夙載生載育

時維后稷

姜嫄炎帝後有邠氏女姜姓嫄名禋祀者高禩之祭也禩即先媒蓋上古始為婚姻者後

世祀之未嫁者祈婚未育者祈子帝武巨人迹也姜嫄見地有巨人之跡履之而敏然歆歆若人道之感焉於是即其攸介攸止之處而震動夙肅震書作娠震肅即孕也由是有娠而生后稷也魯頌亦云上帝是依謂天之神馮依姜嫄之身誕彌厥月先生如達不圻不副無

彌月而生后稷也

誕彌厥月先生如達不圻不副無

苗無害以赫厥靈上帝不寧不康禋祀居然生子

彌月滿十

月也達詩傳他達反小羊也羊子易生愚謂達如字亦通先生如達不圻不副無菑無害以赫厥靈詩人異之也異之者神之也上帝不寧不康裡祀居然生誕置之

子姜嫄疑之也疑之者耻之也耻之故棄之

誕置之

隘巷牛羊腓字之誕置之平林會伐平林誕置之寒水

鳥覆翼之鳥乃去矣后稷呱矣實覃實訏厥聲載路

夫不

而育疑而棄之其誕實匍匐克岐克嶷以就口食蓺之

異如此神而收之

荏菽荏菽旆旆禾稷穰穰麻麥幪幪瓜瓞嗶嗶

荏菽大
莢種也

豆也後列也麻子可食皮可績為衣麥麥牟也瓜瓞以為茹也稷自幼已能辨物惟知種植其天性然也

誕

后稷之穡有相之道第厥豐草種之黃茂實方實苞實

種實稂實發實秀實堅實好實穎實粟即有郃家室

稷后

之穡凡上章荏菽禾麥瓜瓞之類但后稷所種歛則各有助其成實之道蓋知其性及其漬種之法與地之宜天之時故實有以方苞種稂發秀堅好穎粟之也至下章鉅秬糜芑則又自后稷而始知種之爾堯以棄教民稼穡有功生人故封之又以其母感化而育不由有父故使其繼母氏之國胙之土而命之氏也郃又作蘄在京兆武功縣元和志曰郃在渭水之南漢渭縣是也縣西二十里有蘄城有后稷祠姜嫄祠史記取詩紀稷而不實今止取詩為證不及下文○史記曰初欲棄之因名曰棄及為成

人遂好耕農相地之宜宜穀者稼穡焉民皆法則之帝堯聞之舉棄為農師天下得其利有功封棄於郃號曰

后稷別姓姬氏。○路史曰：稷字度展。○鄭石癸曰：媯吉人也。后稷之元妃也。

履祥按：史記姜媯，帝嚳元妃。蘇氏古史因之，遂以后稷為帝嚳之子。媯果元妃，何嫌於不夫而棄其子？稷果嚳元妃之子，何為舍嫡不立而別立堯？周郊太祖何為祖稷而不祖嚳？周祀姜媯，何為舍祖而獨祀妣？命禹治水之時，堯之年已七十有餘矣，而禹猶暨稷，嚳之遺嫡何其少？堯之嫡兄弟何其賢勞也？堯有嫡兄弟不能立，又不能舉待舜而後舉之，則堯何足以為堯乎？鄭康成知史記之說為不通，則謂姜媯當堯之時為高辛氏世妃，蓋其世胄之妃也。二王之後得用天子之禮，故有郊禘、弓韉之禮焉。其說固足以濟史記之不通矣。抑以世胄之妃生子，又何嫌疑而棄之哉？然則媯稷母子果何若人耶？曰：證諸詩而已矣。

生民之詩謂姜嫄履帝武而敏歆闕宮之詩謂上帝
依姜嫄而生稷則固不必捨二詩而他考也朱子曰
巨跡之說先儒或頗疑之而張子曰天地之始固未
嘗先有人也則人固有化而生者矣蓋天地之氣生
之也而蘇氏亦曰凡物之異於常物者其取天地之
氣常多故其生也特異物固有然者矣神人之生而
有以異於人何足怪哉故今以詩為斷不復上附於
譽焉又按易大傳曰神農氏作斲木為耜揉木為耒
以教天下則耕稼之利其來久矣書曰播時百穀詩
稱誕降嘉種貽我來牟則百穀之備自稷始也趙過
曰后稷始畎田則畎壟之法自稷始也晉董史曰辰
以成善后稷是相則農時之節自后稷始也大哉后
稷之為天下烈矣其慶
流子孫光有天下宜哉

九十載

孔子曰舜其至孝矣五十而慕。孟子曰五十而慕者予於大舜見之矣。

癸未一百載帝乃殂落

書曰二十有八載

舜攝二十載也

帝乃殂落百姓如喪考妣

三載四海遏密八音

魂氣歸天為殂體魄歸地為落鬼神之神義盡矣聖人在上又鬼神之神

盛故言其崩曰殂落百姓者畿內之民四海則凡天下之民也

○孔子曰大哉堯之為

君也惟天為大惟堯則之蕩蕩乎民無能名焉巍巍乎

其有成功也煥乎其有文章

文章謂其禮樂制度所以經緯乎天下者也

路史曰帝堯之子十其長號監明先死監明之子式封

于劉其後有劉累事存漢紀

生有文在手
曰劉錙留同

富宜氏史漢

作散宜氏生朱鰲佷媚克兄弟為閔嚚訟嫚淫帝悲之

制奕以閑其情使出就丹虞氏國之房夏后封之唐庶

子九其後傳鑄冀郇櫟函高唐上唐唐杜皆其後御龍

豕韋魯

今在汝

范隨士劉見左氏。鄭康成曰堯遊城陽

而死葬焉。外紀曰葬穀林。古史曰堯後有劉累者
學擾龍於豢龍氏事夏孔甲賜氏曰御龍以更豕韋之

後為豕韋氏商之衰徙居於唐周以唐封叔虞復自唐
徙杜為唐杜氏宣王誅杜伯其子隰叔適晉為范氏范
武子奔秦自秦復歸于晉其處者為劉氏

履祥按堯老而舜攝二十有八年堯與天下相忘久矣一朝殂落而百姓如考妣之喪孟子曰堯之所以治民舜之所以事君於此俱可知矣

甲申百有一載

乙酉百有二載舜避于南河之南

孟子曰舜相堯二十有八載非人之所能為也天也堯

崩三年之喪畢舜避堯之子於南河之南天下諸侯朝
覲者不之堯之子而之舜訟獄者不之堯之子而之舜
謳歌者不謳歌堯之子而謳歌舜故曰天也夫然後之
中國踐天子位焉而居堯之宮逼堯之子是篡也非天
與也○古史論曰舜禹之攝格于祖考郊祀天地朝見
諸侯巡守方嶽行天子之事矣及其終而避之何哉使
舜禹避之天下歸之而其子不順將從天下而廢其子
歟將奉其子而違天下歟此事之至逆由避致之也至

益不度天命而受位於禹避之而天下不從然後不敢
為匹夫猶且恥之而謂益為之哉。大紀曰既除喪舜
委政於皋陶退避於南河之南論曰堯命舜舜命禹行
天子之事舜禹亦既受命行天子之事矣及堯舜既終
又避其子何哉人臣至於代天子行天下之政已亢矣
况又将去人臣以為天子乎堯舜之喪甫除舜禹政自
已出使丹朱商均去其宮室可則可矣是用九為首非
所以明微也故舜禹避之以展天下之情成揖讓之禮

其心與計利害者遠乎如天地之不相及也使舜禹而有計利害之心則是以爭奪行尚何授受之有若夫益則又異於舜禹矣啟賢能敬承繼禹之道益歷事三代年亦老矣奉身而退順天道也讀書者能無以文害辭無以辭害意則孟軻氏之言粲然明白無可疑者。張氏紀年敘曰孟子謂堯舜三年之喪畢舜禹避堯舜之子而天下歸之然後踐天子位此乃見帝王奉天命之大旨其可闇而弗章故以甲申書服堯之喪乙酉書踐

位之實丙戌書元載格于文祖自乙酉至丁巳是踐位三十有三載也則書薦禹於天與尚書命禹之辭合自丁巳至癸酉是薦禹十有七年也與孟子之說合於禹受命之際書法亦然然而書稱舜在位五十載則是史官自堯崩之明年通數之爾。○朱子曰舜禹避朱均而天下歸之蘇子慮其避之足以致天下之逆至益避啟而天下歸啟蘇子又譏其避之為不度而無恥於是凡孟子史遷之所傳者皆以為誕妄而不之信今固未暇

質其有無然蘇子之所以為說者類皆以世俗不誠之心度聖賢則不可以不之辯也聖賢之心淡然無欲豈有取天下之意哉顧辭讓之發則有根於所性而不能已者苟非所據則雖卮酒豆肉猶知避之况乎秉權據重而天下有歸已之勢則亦安能無所惕然於中而不遠引以避之哉避之而彼不吾釋則不獲已而受之何病於逆避之而幸其舍則固得吾本心之所欲而又何恥焉唯不避而強取之乃為逆偃然當之而彼不吾歸

乃可恥耳如蘇子之言則是凡世之為辭讓者皆陰欲取之而陽為遜避是以其言反於事實至於如此而不自知其非也舜禹之事世固不以為疑今不復論至益之事則亦有不能無惑於其說者殊不知若太甲賢而伊尹告歸成王冠而周公還政宣王有志而共和罷此類多矣當行而行當止當止而又何恥焉蘇子蓋賢共伯而尚何疑於益哉若曰受人之寄則當遂有之而不可歸歸之則為不度而無恥則是王莽曹操司馬懿父


子之心而揚堅夫婦所謂騎虎之勢也乃欲以是而言
聖賢之事其誤甚矣

履祥按春秋以上君薨嗣君踰年即位于廟夫即位
必踰年者當喪未君也踰年而即位者不可曠年無
君也獨唐虞之際三年之喪畢而始即位何以知其
然書稱帝乃殂落三載四海遐密八音矣而後書月
正元日舜格于文祖則是舜之即位在三載之後也
書注舜服堯喪三年畢將即位故復至文祖廟司馬
稽古錄亦云然即位於三載之後則聖人之心可見
矣河南之避何足疑乎且謂避之非者以勢言也聖
人有天下而不與固不以勢之利害入其心者而况
五帝之世世質民淳帝堯陶天下於禮遜雍睦之中
百有餘載禹岳諸聖賢咸萃朝廷當是時也帝舜從
容其間勢亦無不可者夫聖經者事之衷也聖心者

理之主也論事而折衷於聖經以求聖人之心焉是為得之矣



御批資治通鑑綱目前編卷一



總校官庶吉士臣張能照

校對官檢討臣郭寅

謄錄監生臣許祖懷